

42
37
22

準
貴

浙江學



紀事本末卷之七十六

提督浙江學政僉事 谷應泰編著

男 際第 訂

際辰

鄭芝龍受撫

熹宗天啓七年六月海寇鄭芝龍等犯閩山湖山中
左等處芝龍泉州南安縣石井鄉人也是其父紹
祖為泉州庫吏蔡善繼為泉州太守府治後為與庫
隔一街相望芝龍時十歲戲投石子誤中善繼額善

繼擒治之見其姿容秀麗笑曰法當貴而封遂釋之
 不數年芝龍與其弟芝虎流入海島顏振泉黨中為
 盜後振泉死眾盜無所統欲推擇一人為長不能定
 因其禱于天貯米一斛以劍插米中使各當劍拜拜
 而劍躍動者天所授也次至芝龍再拜劍躍出於地
 眾咸異之推為魁繼贊海上官兵莫能抗始議招撫
 以蔡善繼嘗有恩於芝龍福建泉州道以書招之
 芝龍感恩為納降及善繼受降之福建泉州道芝龍
 兄弟囚首自縛請命芝龍素德善繼屈意下之而芝



一軍皆譁竟叛去六年春遂據海島截商粟圍中
 港饑望海米不至于是求食者多往投之七月劫商
 民船勢浸大其黨謀攻廣東海豐嵌頭村以為穴芝
 龍乃入閩泊于漳浦之白鎮時六年十二月也巡撫
 朱一馮遣都司洪先春率舟師擊之而以把總許心
 素陳文廉為策應鏖戰一日勝負未決會海潮夜生
 心素文廉船漂泊失道賊暗度上山詐為鄉兵出先
 春後先春腹背受敵遂大敗身被數刃然芝龍故有
 求撫之意欲徵遣于我兵乃舍先春不追獲盧遊擊

不殺又自舊鎮進至中左所督帥命咨臯戰敗縱之
走中左人開城門求不殺芝龍約東麾下竟不侵擾
營報至泉州知府王猷知其詳乃曰芝龍之勢如此
而不追不殺不焚掠似有歸罪之萌今勦難猝滅撫
或可行不若遣人往諭退舟海外仍許立功贖罪有
功之日優以爵秩與泉道鄧良知從之遣人諭意
懷宗崇禎元年春正月工科給事顏繼祖劾福建總
兵俞咨臯下獄初巡撫朱欽相招撫海寇楊六楊七
等鄭芝龍求返內地楊六給其金不為通遂流劫海

繼祖上言海盜鄭芝龍生長于泉聚徒數萬劫富
施貧民不畏官而畏盜總兵俞咨臯招撫之議實飽
賊囊舊撫朱欽相聽其收海盜楊六楊七以為用夫
撫寇之後必散于原籍而咨臯招之流即置之海今
日受撫明日為寇昨歲中左所之變楊六楊七杳然
無踪咨臯始縮舌無辭故賊帥不可不去也疏入逮
咨臯下于理三月禁漳泉人販海芝龍縱掠福建
滿江海上六月兵部議招海盜鄭芝龍九月鄭芝
龍降于巡撫熊文燦工科給事顏繼祖言芝龍既降

當責其報效從之

三年春二月海盜李魁奇伏誅魁奇本鄭芝龍同黨芝龍忌之擊斬粵中夏四月廣東副總兵陳廷對約鄭芝龍勦盜芝龍戰不利歸閩不數日寇大至犯中左所近港芝龍又敗寇夜薄中左所

四年春正月上召廷臣及各省監司于平臺問福建布政使吳賜燧之祺海寇備御若何賜曰海寇與陸寇不同收權撫之但官兵組撫爲安賊又因撫益恣致數年未息上曰前撫李魁奇何又殺之賜曰魁奇

非鄭芝龍比卽撫終不爲我用今鍾斌雖撫亦反側不可保也上問寔計安在祺曰海上官兵肯出死力有司團練鄉兵多設火器以守爲戰勦之不難上問巡撫熊文燦賜曰文燦才膽俱優但視賊太易故前有吉了之敗祺曰鍾斌與鄭芝龍勢不兩立七月間賊擾福州撫臣計訪往泉州前聞撫臣同芝龍討賊僂其兄賊遁去問廣東布政使陸問禮對曰廣東海寇俱自福建至舟大而多火器兵船難近但守海門勿令登陸則不爲害

五年冬十一月海盜劉香老犯福建小埕遊擊鄭芝
龍擊走之

六年夏六月海盜劉香老犯長樂

七年夏四月海盜劉香老犯海豐十二月總督兩廣
熊文燦奏道將信賊自陷時文燦令守道洪雲蒸巡
道康承祖參將夏之本張一傑往謝道山招劉香老
被執上以賊渠受撫自當聽其輸誠豈有登舟往撫
之理弛備長寇尙稱未知督臣節制何事命巡按御
史確覈以聞已令文燦戴罪自效

八年夏四月福建遊擊鄭芝龍合粵兵擊劉香老于
田尾遠洋香老脅兵備道洪雲蒸出船止兵雲蒸大
呼曰我矢死報國亟擊勿失遂遇害香老勢蹙自焚
溺死康承祖夏之本張一傑脫歸八月香老家屬六
十餘人部屬千餘人至黃華降于溫處叅軍

十一年秋八月加福建叅將鄭芝龍署總兵芝龍既
俘劉香老海氛頗息又以海利交通朝貴寢以大顯
十六年冬十一月設南贛兵三千以副總兵鄭鴻達
統之

十七年春正月前兵科都給事中曾應遴薦副總兵鄭鴻逵緩急可用詔益南贛兵二千命鴻逵鎮守諭年鴻逵以舟師守鎮江我

清兵南下潰歸鄭芝龍降

谷應泰曰海上亡賴奸民多相聚爲盜自擅不討之日久矣蓋以魚鹽蜃蛤商舶往來剽掠其間者累千金利則乘潮上下不利則嗚聚島中儼然以夜郎扶餘自大東南邊徼益騷然苦之矣泉州人鄭芝龍筦庫之子也年未弱冠爲海

魁顏振泉所掠振泉愛芝龍狀貌因有寵泉死衆推爲魁然而龍特饒智數樂黠喜持兩端其他無絕殊者方其侵暴外洋也輸金子楊六綏追于洪先春黃巾未破于曹公赤眉約降于光武其持兩端者一也及其受撫內地也私鬪則勇于魁竒公戰則怯于廷對殺陳餘于泚木縱匡術于石頭其持兩端者二也又若擁兵閩越援立外藩定策功高闔門橫玉而乃陰懷首鼠百計沮軍滹沱既未合兵東吳豈能遽下居吳

人爲奇貨以澶淵爲孤注其持兩端者三也又
若關門旣下釋甲入臣居第京師招搖海上曾
無麟閣之功但比遼東之豕隗囂待子而身反
于外延之在臺而子更舉兵其持兩端者四也
夫奉先之失在于去就輕脫故依建陽則背建
陽依董卓則背董卓率之之敗在于天性反覆
故附道子則反道子附元顯則反元顯今芝龍
以盜賊之雄挾遠遊之智而鷹眼不化狼心已
成身在樊籠之中志存江湖之上一旦緩急可

得信乎然子又怪崇禎之初芝龍旣撫銳意行
金織皮丹珀來自賈胡明珠文犀至皆兼兩是
以薦剝頻上爵秩屢地坐論游王卷有數郡人
但知元龜象齒都自淮來而不知寶玉大弓原
從魯竊若能却盜泉之水則不至奪君子之器
矣說在孔子之對康子也

金... 卷之七十七... 紀事本末... 卷之七十七... 紀事本末... 卷之七十七...

紀事本末卷之七十七

提督浙江學政僉事豐潤谷應泰編著

男 際第 訂

張獻忠之亂

崇禎元年延安饑谷府民王嘉胤作亂延安人張獻忠從之獻忠陰謀多智賊中號八大王其部最强旁掠延安諸郡邑

四年張獻忠率眾二千人就撫于三邊總督洪承疇

五年獻忠復叛隨賊首高迎祥紫金梁等轉寇山西諸郡縣

七年羣賊轉寇河南張獻忠犯信陽鄧州遁入應山洪承疇率諸將逐賊于河南獻忠西奔商雒遁盩鄠間與延安賊李自成偕澄城寇平涼邠州旋與羣賊出潼關寇嵩汝

八年正月諸賊盡集宛雒張獻忠東走掠廬鳳安慶二月與老回回西走商州復至秦川十一月獻忠與羣賊自潼關出犯閩鄉靈寶東行庚申總兵祖寬

大破獻忠于姑家廟十二月獻忠合諸賊圍廬州分道陷巢縣含山遂陷和州沿江下犯江浦

九年正月張獻忠合羣賊圍滁州總理處象昇大敗之賊竄河南

十年羣盜久擾河南無可掠悉入楚寇蕪黃間官軍敗獻忠于黃岡獻忠復入江北東掠至儀真揚州告急獻忠尋西走入楚

十一年正月總兵左良玉陳洪範大破賊于鄭西張獻忠請降初獻忠自良涿囑而爲盜洪範捕獲獻忠

異其貌而釋之以是懷舊恩乞降于洪範請率所部
殺賊自效總理熊文燦承制撫之獻忠請置家口于
鄖西文燦爲請于朝詔貸其罪立功自贖獻忠乃率
部曲數千居白沙界山獻忠狡而多計羣盜每以爲
的其降也自言能制鄖襄荆承數百里內外無一賊
文燦每曲徇其請益驕不奉法屢檄從征不應獻忠
又求襄陽一郡以屯其軍文燦議餉二萬人獻忠乞
餉十萬人文燦遷延不能應十月獻忠聲言寄家口
于穀城入據守之分屯羣盜于四郊十一月羅汝

才亦就撫文燦安其衆于房竹間與民錯壤而處遙
與獻忠爲聲援奪民禾而食不奉縣官法鄖楚偏沈
諸撫咸以爲憂文燦剛而愎又新有功而驕皆不聽
鄖襄人惴惴恐禍至無日矣

十二年五月張獻忠叛于穀城初賊首高迎祥旣誅
李自成因川西羣盜失勢獻忠連敗精銳俱盡始乞
撫以綏誅初無降意及據穀城潛勾諸賊爲犄角遂
復思叛去舉人王秉貞爲之謀主至是遂殺穀城知
縣阮之錕以叛羅汝才九營並起應之獻忠脅御史

林鳴球上書求封于襄陽，鳴球不從，遂殺之。七月，熊文燦檄諸將進兵穀城，獻忠焚穀城西走，與羅汝才合。左良玉追賊于房縣西，賊設伏羅喉山，良玉兵度隘入伏中，賊四合圍之，突圍戰，敗績，一軍盡沒。良玉失其符印，僅收殘兵數百，走向房縣。事聞，文燦、良玉俱革職，殺賊自贖。九月，大學士楊嗣昌督師討賊，十月至襄陽，逮熊文燦論死。賊自是而散。十三年二月，平賊將寧左良玉大破張獻忠于太平縣之瑪瑙山，斬首萬級，獻忠精銳俱盡，止驍騎千餘。

自隨遁走興歸山中，尋白鹽井竄興房界上。左良玉屯興安平利諸山，連營百里，諸軍憚山險圍而不攻。賊伏深箐中，重賄山氓，市鹽芻米，酪山中人安之，反爲賊耳目。陰輸兵情于賊，獻忠得以休夏收散亡養夷傷，羣盜往往歸之。兵復振，時羅汝才過天星七股，賊盡入蜀。六月，獻忠自興房走白羊山，入巫山隘，聞川兵躡之，益入深谷中，掩息旂鼓，轉入而西，不知所往。都司曹進功率兵入山偵賊，不見一人而還。七月，獻忠既西，羅汝才屢爲官軍所敗，勢孤，率黨走。

合于獻忠共謀渡川西諸將賀人龍李國奇張應元汪雲鳳張奏凱等會師擊之應元雲鳳營于夔之土地嶺待賀人龍兵三檄不至初督師嗣昌以左良玉跋扈難制而人龍屢破賊有功請以人龍代良玉佩將印既而以良玉瑪瑙山捷度未可動復奏留良玉佩印如故別加人龍總鎮銜須後命人龍初聞大將之拜踴躍動三軍既報寢乃鞅鞅良玉知其故意亦恨當獻忠之遁伏興歸也千餘殘寇可盡乃良玉以奪印懷慚人龍復以歸印缺望遂途巡不復深入致

獻忠復熾皆嗣昌失兩帥之心玩寇故也人龍屯關縣每以餉乏爲辭頓兵不進癸亥人龍兵噪而西歸已巳官軍敗績于土地嶺時張應元汪雲鳳所將楚兵五千皆新募未經行陣待人龍兵久不至獻忠知官軍無後繼悉銳來攻應元雲鳳簡銳千人搏戰晨至日中未決賊分兵繞後山而下突入營中守營新兵皆譁賊乘之前後合圍二將連兵死戰應元中流矢奮擊突圍出賊方渡巴霧河應元馳赴河上然礮擊殺一賊帥衣緋者賊不得渡雲鳳苦戰久得脫瀆

飲水斗餘，臥血凝臆，而卒。兵多潰亡。九月，獻忠汝才陷大昌。庚寅，屯夔城山背。賊行營輜重婦女甚衆，而諸軍多觀望不前。但尾賊後，所至關隘，防兵多遠遁。賊長驅直過，二賊合兵趨達州，謀西渡。丙午，賊渡河，遂入巴西。督師嗣昌命監軍萬元吉監諸軍西行，尾擊賊。十月壬戌，獻忠汝才陷劍州。甲子，過劍閣，趨廣元，直走陽平關。從間道別出百丈山，將入漢中。總兵趙光遠守陽平，甚嚴。賀人龍、李國奇復整兵而東，賊乃踰昭化，走西川。丙寅，川兵追賊于劍州，敗。

績賊擒四將以去。官軍轉戰于綿州，逐北至城下。賊渡綿河而西。十一月庚辰，督師監軍元吉大饗將士于保寧，以諸軍進止不一，立大帥以統之。以總兵猛如虎爲正總統，張應元爲副總統。癸未，發保寧趨綿州。諸將分屯要害。元吉督諸軍自間道趨射洪，扼蓬溪以待之。癸卯，賊屯安岳。知大兵且至，宵遁，走內江。乙巳，猛如虎至安岳，遇驍騎逐賊。元吉與應元屯于安岳城下，以遏賊歸路。十二月己酉，賊走瀘州。賀人龍等以兵躡之。辛亥，賊陷瀘州。瀘州三隅皆陸。

絕臨江止立石站一路可北走賊既走絕地元吉謀以大兵自南搗其老營伏兵旁塞險要蹙賊北竄永州逆而擊之可以盡殲也乙卯元吉兵至立石站賊營先移渡南溪官軍隔水追之不及癸亥賊越成都走漢川德陽復至綿河

十四年正月丁丑獻忠汝才入巴州己卯走達州甲申賊渡達河而東往新開焚燬驛道人烟斷絕者七百里初賊南竄元吉欲從間道出梓潼扼歸路以待賊嗣昌檄諸軍躡賊急追不得距賊遠令他逸諸將

皆盡向瀘州賊折而東返歸路盡空不可復過賀人龍頓兵廣元不進己丑猛如虎率諸將及賊于開縣日暮雨作諸將咸以人馬乏請詰朝戰參將劉士傑曰自瀘州逐賊馳驚四旬僅而及之惟敵是求今遇賊不戰縱敵失賊誰執其咎乎請爲諸君先揮戈而進如虎亦率親兵從之士傑奮勇前搏賊陣連勝之獻忠憑高而望見後軍無繼左軍皆前却不進因以精銳繞谷中出官軍後馳而下左軍先潰士傑及游擊郭關如虎子猛先捷皆戰死前軍已覆如虎突戰

潰圍出馬伏軍符盡失賊東走巫山大昌監軍元吉
赴開縣收召殘兵祭陣亡諸將哀動三軍嗣昌在雲
陽聞開縣失利始悔不用諸將扼歸路之謀矣初賊
之西渡違河也嗣昌策其必入秦令左良玉自興歸
趣漢中及賊東走嗣昌復檄良玉自夷夔進勦使者
單行中道返命曰平賊已入漢中矣既慮其言不售
也更使人給良玉曰賊向漢中矣良玉不至嗣昌之
使十九返良玉日向依督師令瑪瑤山安得功乎遂
撤興房兵趨漢中賊下夔門無一人攔截者賊既度

巫山晝夜疾走興房山中 二月獻忠汝才走當陽
鄖撫袁繼咸悉兵扼賊于房竹賊走宣城復聚陽無
備簡二十騎持符偽爲官兵已酉夜至城下守者驗
符信啓關賊既入卽揮刀大呼殺門者城中先伏賊
百餘俱起應之縱火光燭天賊大隊疾馳至城中大
亂門洞開庚戌昧爽賊盡入城知府王承曾突圍走
兵備副使張克儉推官酈曰廣死之賊焚襄王府執
襄王獻忠據坐王宮坐王堂下勸之以卮酒曰吾欲
斷楊嗣昌頭而嗣昌遠在蜀今當借王頭使嗣昌以

○陷藩伏法王其努力盡此一杯酒因縛王殺之投屍
火中福清王常澄逃免潛遣人索王屍已燼僅拾顱
骨數寸以歸賊殺宮眷并貴陽王常法盡掠宮女發
銀十五萬以賑飢民襄陽守兵數千軍資器械山積
盡爲賊有初左良玉屢破賊掠其輜重盡畜之許州
爲獻忠襲取良玉在鄖唐家口貲蓄于襄陽至是復
盡爲獻忠有良玉聞之同鄖撫袁繼咸發兵馳援已
不及癸丑賊渡江破樊城己未陷當陽郟縣乙丑陷
光州新野 三月丙子督師大學士楊嗣昌自益于

軍時李自成已陷河南福王遇害嗣昌以連失二郡
喪兩親藩度不免遂自盡監軍元吉部署行營命孟
如虎駐蘄黃防獻忠東進上以襄陽失陷左良玉違
制避賊削職戴罪平賊遣鄖撫袁繼咸入京 四月
獻忠焚掠襄陽既空聞左兵漸逼以兵三萬犯應山
知縣章日輝擊却之北至隨州掠汝寧縣難民逸歸
見獻忠面帶刀瘢二箭創一方令羣盜備乾糲爲半
月糧往攻固始陷光州漸逼麻城 革左諸賊在皖
桐聞獻忠東來自潛去至麻城勾合之將謀渡江巡

撫宋一鶴擒賊謀焚其舟。庚午獻忠汝才合兵陷
隨州知州徐世淳死之。合戶被殺吏民屠僇不遺血
流成溝澮。六月左良玉敗獻忠于南陽之西山。獻
忠西走與汝才合兵攻南陽晝夜穴城知府顏日愉
力拒之賊去。爾信陽獲左兵旂幟令羣盜襲以大泌
陽陷之。癸亥走隨州。七月丁丑獻忠圍鄖陽鄖兵
禦之多殺傷。巳卯獻忠宵遁。總兵黃得功戲下兵
叛西走投獻忠。獻忠陷鄖西。羅汝才忤于獻忠北
走合自成。左良玉敗之于鄧州。再敗之于浙川。辛

卯鄖兵與獻忠戰敗績。獻忠以所擒鄖兵人斷一手
縱歸以辱官軍。督師丁啓睿與左良玉俱屯南陽。頓
兵不進。獻忠旣拔鄖西馬騾審甲搶獲甚盛。羣盜蟻
附之。衆至數十萬。獻忠屢勝而驕。八月東掠信陽。左
良玉營多降將。家在鄖襄多被獻忠殺掠。人思致死
于賊。良玉乃自南陽引兵逆擊。獻忠于信陽。斬其首
將沙賊大破之。奪其馬萬餘。降衆數萬。獻忠負重創
易服夜遁。竄入山中。良玉軍聲大振。降附日衆。遣諸
將分道窮搜。獻忠戊午獻忠收餘衆數千。反走向鄖

陽驛遇官軍不戰而潰棄馬騾二千尚有衆二千趨南陽負創不能馳保其婦豎日行三十里部曲日逃十六七僅隨數百人辛未良玉自鄭北發獻忠已過南陽追之不及監軍御史汪承詔劾將士觀望縱賊羅汝才既北合李自成自成踞河雒有衆五十萬獻忠衆散自盡九月因汝才以奔自成初獻忠與自成並起延西以狡詐相雄長自陷襄陽嗣昌縊死自以威名遠出自成右及敗來歸僅從數百騎自成方強欲屈之獻忠不爲下自成怒欲殺之汝才知之陰

選良馬五百騎資獻忠令他從獻忠乃盡夜東馳與回華諸賊合入霍山扼險拒守督師啓濬以兵赴商城旋北行討李賊獻忠得逸山中十月張獻忠合六營賊復出攻舒城

十五年二月乙卯張獻忠陷亳州亳州官吏先已棄城走賊按兵入城三月獻忠合回華諸賊復攻舒城四月壬寅舒城陷時舒城無令叅將孔廷訓以兵于人同編修胡守恒率民共守七閱月廷訓降于賊勾賊攻城守恒倡舒人死守賊以洞車穴城守者

數處守恒督軍民補塞之賊射書脅降守恒燔其書于城上越三日城陷賊執守恒刃其腹被數十創以死獻忠屯舒城改曰得勝州令降將孔廷訓攻霍山河南賊袁時中以兵會獻忠乙巳獻忠合諸賊陷六安五月甲戌張獻忠襲破廬州先是獻忠遣英霍遊民陽爲貿易者潛入廬州城適督學御史以較士至郡獻忠遣賊數百負書卷衣青衿雜諸生應試者旅寓城中甲戌夜漏三下獻忠捲甲疾馳入郡城中賊縱火應之城陷學使者及備兵副使蔡如蘅俱

走知府鄭履祥死之廬州城池高深賊屢攻不能克至是一夕而陷獻忠歛兵退屯巢湖畧含山巢縣

六月辛亥獻忠襲陷廬江焚修一空還兵舒城入

月辛丑獻忠分三軍一軍上六安一軍趨廬州一軍

往廬江三河掠雙橋巨舟二百艘復大治舟艦于巢湖習水師因大會羣賊合水陸五十六營集于皖口

壬子獻忠復陷六安將州民盡斷一臂男左女右總兵黃得功劉良佐兵救六安營于夾山嶺再戰敗績得功歸定遠獻忠再陷六安挫得功良佐兵謀渡

江入南京遂僭號改元刻偽寶選自宮男子偽署總兵以下官九月黃得功復以大兵逐之巳卯賊悉走潛山命賊將一堵牆爲殿營于山上步騎九十哨分營爲四前阻大溝後枕山險爲持久計得功良佐捲甲疾趨夜半緣山後謀而升賊驚起失措且前阻大溝不能成列官軍奮擊賊踰崖跳澗四潰追奔六十里斬首萬餘獻忠潰圍走一堵牆伏林中焚殺之填屍溢溪壑臭達百里奪馬驟數萬賊腹心謀士婦豎俱盡十月丙午劉良佐再破獻忠于安慶奪馬

騾五千救回難民萬餘獻忠引兵西走蘄水十一月獻忠西入楚劉良佐旋師淮安黃得功旋師定遠十二月獻忠復東去陷桐城屠之初獻忠西遁諸軍俱勦袁時中于穎故獻忠乘虛突出丙戌陷無爲州遂陷黃梅壬辰陷太湖

十六年正月辛酉張獻忠以二百人夜襲陷蘄州明日令薦紳孝廉文學各冠帶自東門入西門出盡斬之遂屠蘄州留婦女毀城稍不力卽被殺執守道仁和許文岐獻忠曾賈杭州識文岐頗禮之文岐陰謀

圖賊乃被殺時楚兵盡隨良玉東下蘄黃一帶惟士
兵三百人守蘄水獻忠乘虛克斥三月丁酉陷蘄水
屠之 甲寅左良玉引兵自池口西上屯安慶 丙
辰獻忠自蘄水疾馳至黃州乘大霧攻城黎明城陷
執副使樊維城欲降之罵賊不屈賊刺之洞胸死獻
忠據府自稱西王麻城諸生周文江倡亂迎降獻忠
獻忠大喜偽授文江知州城尋陷羅田 五月總兵
方國安率兵七千扼蘄州獻忠西向武昌武昌武備
積弛闕獻忠窺江漢時議募兵守城而庫藏空結楚

王有積金百萬二司長史貸金數十萬以贖軍王不
應大學士賀逢聖家居倡義捐貲募兵僉謂宜募士
著適承天德安潰兵俱下楚王盡募之爲軍鋒以長
史徐學顏領之號楚府兵 獻忠沿江而上悉師破
漢陽臨江欲渡武昌大震議撤江上兵嬰城守參將
崔文榮曰守城不如守江守江不如守漢磨盤煤炭
諸洲淺不過馬腹縱之飛渡而嬰城坐困非策也議
者不從賊果從煤炭洲而渡直逼城下文榮禦之小
有斬獲賊攻武勝門文榮率諸軍擊之殺數萬王戊

楚府新募兵爲賊內應開門迎賊文榮躍馬持矛大呼殺賊三人賊攢矛刺之洞腋死大學士賀逢聖與文榮俱守武勝門城陷歸家衣冠北向再拜以巨舟載其家出敷子湖至中流鑿舟全家溺者十二人逢聖屍沉百七十日不壞十一月壬子始出塋長史徐學顏與賊格鬪斷左臂右手持刀不仆賊支解之楚宗多從賊者賊執楚王盡取宮中積金百餘萬輦載數百車不盡楚人以是咸憾王之愚也賊以篋輿籠王沉之西湖屠僂士民數萬投屍于江尚餘數萬人

縱之出城以鐵騎圍而蹙之江中浮屍蔽江而下武昌魚幾不可食其遺民數百多脫斷手足鑿毀目鼻無一金形者獻忠遂據楚王府僭稱武昌曰京城僞設六部五府鑄西王之寶開科取士殿試取三十人爲進士授郡縣官初李自成兵臨漢陽不克闕獻忠取之自成怒榜示遠近日有能擒獻忠以獻者賞千金及聞取武昌復遣人賀之曰老回回已降曹革左皆被殺行將及汝矣獻忠得書而懼多賫金寶報使于自成自成留其使獻忠恨之六月丙戌諭平

賊將軍左良玉專勦張獻忠母老師糜餉 七月辛亥方國安合左營副將徐懋德馬士秀等步騎二萬從蘄州而上夜擊賊于大冶斬首千級前鋒旣勝左鎮諸軍並進獻忠聞之戊午以四賊帥守武昌爲浮橋于金口悉衆西渡屯舟師于湖中謀向岳 八月丙寅方國安等進兵黃州斬僞知府癸亥諸將進次陽邏堡距武昌三舍監紀知縣吳敏師聯絡蘄黃四十八寨義勇數萬人與師會總兵常安國以舟師先進轉戰金沙州奪賊舟百艘賊騎反走焚城下諸舟

嬰城自保安國等退屯漢口 丙寅諸軍齊壓武昌而軍賊出戰大敗退入官軍逐之遂入城賊開門西走諸將縱兵屠僂萬計遂復漢陽并諸屬縣 張獻忠陷咸寧蒲圻距岳州二百里沅撫李乾德總兵孔希貴以兵二萬穿城陵磯盡移岳州居民他避令軍士詐爲居民開門迎賊賊入城伏發賊盡殲留四賊賊割一耳貫箭縱回以辱賊獻忠怒益兵進攻乾德虛立營壘道傍林中植旗幟伏大砲積薪其上賊以火攻之延燒積薪砲大發殺賊數百賊益怒水陸並

紀事本末 卷七十七
進乾德飾戰艦中流向賊營度矢石可及即止不進賊連弩射良久乾德度賊矢礮且盡水陸奮擊大敗之三戰三捷獻忠乃悉衆二十萬圍岳州百道俱攻力屈城陷乾德希貴俱走長沙戊辰賊前鋒至湘陰湘陰民俱空城走獻忠分軍爲二一軍下長沙一軍上荊州獻忠欲北渡卜于洞庭湖神不吉三十神終不許庚辰獻忠歛舟湘潭數千艘將北渡忽大風起覆舟百餘溺死數千人因復還岳州盡殺所掠婦女投屍江中焚其舟火延四十里江水夜明如晝遂陸

行向長沙甲申至城下長沙人民先已走乾德奉吉于惠王走衡州丙戌長沙陷總兵尹旻民何一德降賊巡撫王聚奎單騎走江夏推官蔡道憲死之先是武昌陷聚奎南奔長沙道憲請還屯岳州謂岳與長沙唇齒也併力守岳則長沙可保而衡永無虞聚奎屯岳數日仍南徙驅萬人入長沙所過如洗憐甚于賊尋遁入湘潭及賊至城下呼推官曰吾軍中皆知爾名可速降毋自苦也道憲挽強弩射之獻忠怒攻三日夜而城陷執道憲百計誘降不屈礮之健卒

林國俊等九人追侍道憲不去賊勸道憲降時國俊
曰如吾主可降亦去矣不至今日賊云爾主不降
亦不得生國俊曰若我輩願生亦去矣不至今日
併殺之內四卒奮然曰願且延旦夕葬主骸焉
○办賊義而許之于是四卒解衣裹骸葬之南
卒自經死獻忠既陷長沙設立偽官大書偽
遠近降賊將先民一德願効前驅進取江
偽封世襲伯 庚寅賊襲陷衡州桂王及
走永州九月獻忠拆桂王府殿材至長沙

遣兵南追三王至永州巡按湖南御史劉

師禦之遣兵護三王南行入廣西而自入

奸人肉應開門迎賊熙祚被賊執賊欲脅降

囚之永陽驛中閉目絕食題絕命詞于壁賊

降之臨以白刃熙祚大罵不已遂遇害于是全

陷 戊戌官軍入岳州初獻忠陷岳州置偽官守

悉率羣賊南畧地官軍進復之偽官俱伏誅 獻忠

屯衡州復分軍爲三一軍往永州一軍入廣西全州

一軍犯江西袁州獻忠歸長沙開科取士 丙辰賊

前鋒至袁州獻忠至萍鄉知縣棄城走萍鄉士民牛酒遠迎賊路相屬戊子賊陷萍鄉盡焚公廨屋廬空其城獻忠歸長沙分兵徇攸縣分宜十月甲子賊陷萬載于是瑞安臨江新喻分宜之人俱空獻忠遣別將趨連州南贛兵備副使王孫蘭駐韶州兵不滿百聞之遽自經知府踰城遁韶民盡逃袁州迎降于賊賊陷袁州左良玉以副總兵吳學禮援袁州次于分宜甲戌進圍袁州偽將丘仰寰拒守都司高山奮身先登斬賊二千四百奪馬六百擒斬丘仰

寰遂復袁州時江西袁州吉安臨江人民多被山谷官兵淫殺獻得三郡民所在屯結以拒官軍江西巡撫郭都賢檄撤兵回九江招土著戍三郡官兵既撤賊目長沙矣至吉安丁丑備兵副使岳虞魯方閱軍于郊俄報賊至皆潰虞魯走戊寅吉安陷諸縣同日而陷賊設偽官改吉安為親安府廬陵為順民縣賊將張其在發偽檄馳下袁州兵民皆傾城先竄賊復入袁州獻忠在長沙增兵為九營四營皆老卒五營皆新附左良玉令馬進忠諸將馳兵赴袁州馬士

秀以步兵上臨湘岳州令惠登相規復襄陽劉洪起
規復南陽 乙酉獻忠遣賊將馬賜下臨湘取米及
釜方國安遣兵進扼于蒲圻 十一月壬辰汀督呂
大器兵復吉安 癸巳獻忠遣四賊將下岳州沿江
設伏藏輕舟于汊港以巨艦載輜重順流下副將王
世泰楊文富以兵三千邀擊之賊逆流陽走以誘官
軍官軍爭利泝流上盡奪其資入舟舟重不能速行
賊輕舟四出圍之夾岸賊兵邀擊官軍殺溺無算方
國安等諸將合兵救之僅奪回文富世泰喪師二千

舟二百艘岳州軍民空城走賊疾趨復陷之 壬寅
詔承天太監何志孔勞良玉軍以恢楚有功加良玉
少師蔭一子吏士各陞秩大賚各軍詔良玉移鎮武
昌良玉令馬士秀趨長沙搗賊後令馬進忠等趨袁
吉迎擊其前甲寅馬士秀等復臨湘賊奔岳州諸將
追至岳州賊將混天龍步騎數千拒南岸以輕舟數
十順流下邀官軍士秀三分其軍以殿後者交射南
岸賊乘風直上繞賊舟後反擊之賊大敗盡奪其舟
南岸賊疾入城士秀麾諸軍登岸四面乘城鱗次入

賊突門復走長沙斬首四千餘級遂復岳州 乙卯
馬進忠等進兵分宜賊盡竄袁州丙辰進趨袁州賊
開門西走諸軍逐之三十里復袁州盡誅諸僞官斬
首三千級奪賊馬五百弓矢數萬 十二月張獻忠
遣兵陷建昌又陷撫州南豐 獻忠遣人逼好子老
回回時老回回爲李自成據荊州獻忠與修舊好合
兵李自成旣入關獻忠益橫荆岳間 丁亥獻忠前
鋒艾四轉戰至蒲圻馬進忠禦之再戰敗績

十七年正月張獻忠自岳陽渡江虛設僞官于江南

大隊俱往江北遂棄長沙造浮橋于三江口以一軍
過荊州盡棄舟楫步騎數十萬入夔州 二月方國
安馬進忠復長沙左良玉遣兵追賊于沙陽 六月
張獻忠陷涪州瀘州蜀王告急請濟師于南都左良
玉兵屯德安獻忠順流陷佛圖瀘遂圍重慶悉力拒
守四日而陷瑞王闔官被難舊撫陳士奇死之賊屠
重慶取丁壯萬餘剝耳鼻斷一手驅徇各州縣兵至
不下以此爲令但能殺王府官吏封府庫以待則秋
毫無犯由是所至官民自亂無不破竹下者 八月

張獻忠進陷成都蜀王闕宮被難巡撫龍文光暨遠
府各官皆死之獻忠大索全蜀紳士至成都皆殺之
既而懸榜試士諸生遠近爭赴獻忠以兵圍之擊殺
數千人咸挾筆握策以死蜀中士類俱盡復大殺蜀
民全蜀數千里蕭條絕無人跡時中原多故諸將無
暇西顧獻忠遂奄有兩川李自成敗益發兵攻漢中
陷之獻忠逡巡自守不敢出未幾獻忠以病死于蜀
中

谷應泰曰昔者周書越人閔不畏死三輔從橫

持斧而出以至鄭苦蒼莽之警楚定僕區之法
草竊奸宄自古患之矣然未有自秦寇晉豫州
豫入楚蜀轉掠江右旋犯粵西二十餘年之間
取肝益膳流血成渠里落蕭條宗社顛覆若張
獻忠之甚者也考獻忠與李自成因飢扇亂並
起延安孫恩甫叛盧循卽興仙芝旣起黃巢來
附同惡相濟若連矢然天禍人國以有北孽耳
其時掩捕渠魁賑卹餘黨用張京兆之鳴鼓兼
汲長孺之發粟平定安集一長吏事也奈何燎

原莫撲滋蔓難圖。嗚聚爲羣，旁抄郡邑，揚火作
而湖湘悉陷，黃巾起而山左不平。使天子有西
顧之憂，蒼生有喋血之患者，揆厥亂源，誰執其
咎哉！然而獻忠無他技巧，止以陰謀多智，暴豪
嗜殺可乘之蔽，正自不少耳。方夫賊師屢挫其
弱，可擒賊氣方張，其驕可掩，賊黨內携，其釁可
開也。假令良玉太平之捷，精銳俱盡，得功潛山
之捷，屍填溝壑，便當乘勝追奔，不令逸去。卽子
儀克新店而收東京，懷仙克河陽而滅朝義，故

曰其驕可擒也。又若襄陽初陷，獻忠橫恣，去安
再下獻忠，敗元若能轉敗爲功，出彼不意，卽元
濟氣盛而李愬夜襲淮蔡，穎川甫陷而長源規
取范陽，故曰其驕可掩也。又若南陽之敗，自成
蓄謀以圖漢陽之取，自成懸金以購，若能用謀
出奇，兩虎自鬪，卽呂布交疎于袁術，慶緒授首
于思明，故曰其釁可開也。乃諸臣計不出此，而
天與不取，地險坐失，遠棄漢川，近防江夔，纜屯
石站，已渡南溪，以至萬元吉才同崔浩，不竟其

用李乾德孔希貴智埒淮陰勢絀而走賀逢聖
蔡道憲忠比雖陽力盡而死比至歲月遷延四
分五裂師老財匱而天下之大勢去矣然予以
元和討賊全倚裴度建興恢復獨任武侯而楊
嗣昌者白面書生不嫻將畧寇氛剽銳即非却
雲之後疾大藩踴躍便同孟昶之仰燕雖復引
義自裁亦云無媿而應元士傑尚昧發醜如虎
人龍終垂駕馭譬之次律陳濤之敗中軍石頭
之衄爲法受惡亦所不得辭也論者又以獻猶

揚蜀闖則犯關按法行誅薄乎滅等而不知獻
亂以來材賦絀于吳楚士馬斃于荆襄民命塗
于中野夫是以瓦解土崩一蹙而壞譬猶人之
死也獻繫其手而後闖刺其心獻舉其胸而後
闖扼其吭則獻之與闖厥罪惟均也窮奇擣柝
又可以九品差次乎哉

滿以來其相繼主... 雖聞則限... 不沾泥等相次俘獲自成走

紀事本末卷之七十八

提督浙江學政僉事豐潤谷應泰編者

際第

男

際辰

李自成之亂

懷宗崇禎元年延安大饑不沾泥楊六郎王嘉胤等率眾掠富家粟有司捕之急遂揭竿為盜米脂人李自成性狡黠善走能騎射家貧為傭書往投焉已而暴政洪承疇擊賊破之不沾泥等相次俘獲自成走

匿山澤間得免

二年冬十月都城警詔天下勤王山西巡撫耿如杞入援兵潰于涿鹿叛走秦晉關山谷李自成出與之合旬日間衆至萬餘推高迎祥爲首稱闖王轉寇山西河南賊中稱自成爲闖將已而官軍擊迎祥斬之羣盜推自成爲王

七年總督洪承疇率總兵曹文詒等先後勦諸賊斬獲甚衆羣賊悉奔入高維興平大山中衆潰散李自成與張獻忠奔盩厔間十六月總督陳奇瑜圍李自

成于漢中車廂峽會連雨四才日賊馬乏芻歿者過半弓矢俱脫賊大窘自成乃自縛乞降奇瑜許之各給免死票回籍自是復縱橫不可制矣秋七月李

自成陷澄城圍郟陽聞洪承疇兵至解圍去轉寇平涼邠州八月李自成陷真寧殺知縣趙璠高洪承疇兵至賊棄金帛餽官兵竟西遁屯乾州招之不聽

十月總兵左光先擊李自成于高陵富平間斬首四百餘級自成佯求撫于監軍道劉三顧真寧知縣王家永遽信之出城招諭矢其甲三顧逆其詐卽入

堡自守賊走涇原賊許綸大其甲三萬賊其首領人
八年羣賊盡集死維李自成獨留秦平其衆七八萬
總督洪承疇邀擊連敗之秦中郡縣俱堅壁清野賊
饑疲東西分竄退屯興平武功諸梁計窮乞撫以緩
兵陰遣諸賊攻掠山谷堡塞搜掘巨室窖藏芻糧盡
爲賊有賊旣得食復連營走漢中爲西兵所挫東走
邠寧環慶其衆漸散會承疇以寧夏兵變旋師追鎮
自成得收餘燼復振突出潼關守將艾萬年等兵俱
貴

九年春正月李自成出河南攻固始左良玉遇自成
于閿鄉相持六日總兵陳永福援之敗之于朱仙鎮
自成走登封密縣三月李自成誘別部賊入河南
當官兵而自帥麾下奔漢南循南山險阨遵商維而
行復出陝西官軍敗績于羅家山死亡士馬無算自
成自鄜州至延綏夏四月李自成欲往綏德渡河
入山西定邊副將張天機力戰却之賊沿河犯朝邑
將圍綏德延綏總兵俞翀霄引兵逐賊陷賊伏中翀
霄被執綏延精卒盡覆賊分陷米脂延安綏德賊本

延安人至是再入延安衣錦繡畫遊街其親戚故從
亂者益衆

十年春正月官軍敗績于寶鷄李自成寇涇陽三原
西安大震賊勢益熾冬十月丁酉李自成同過天
星九股陷寧羗分三道入西川自成自七盤關度朝
天閣戊戌至廣元壬寅陷昭化癸卯過劍閣甲辰陷
劍州乙巳陷梓潼黎雅叅將羅尚文大敗賊于廣元
斬首千級賊自梓潼分爲三一走棗川一趨綿州一
入江油遂陷青川彭縣盤亭諸縣圍綿州康成賊漸

逼成都主寇蟻附之巡撫王維章次保寧畏賊不敢
出丙辰賊焚郫縣該軍維章職以傅宗龍巡撫四川
十一年二月李自成陷瀘溪陝寇盡聚川西總督洪
承疇檄川中諸道兵嚴守要害賊困乏食承疇以川
師誘之陝兵設伏于梓潼自成率羣賊逐州兵川兵
走伏發賊大敗斬首千餘級殲之自成率殘衆數千
走溪南子身入楚依張獻忠不許至汀溪獻忠謀殺
之自成獨乘驟日行六百里走商雒至浙川老回回
營卧疾半年餘老回回授以數百人仍出剽掠其同

自成入川諸賊仍出階文向陝西人出關其同
十二年九月秦兵大破李自成于函谷自成衆散畧
盡其部下相繼俱降自成竄漢南秦兵蹙之于北左
良玉阨武關以南自成窮蹙不得他逸食且盡自經
者數四養子李雙喜救之自成因令軍中盡殺所掠
婦女以五十騎衝圍而南初諸將困自成嶠函諸山
中斷其要害合圍甚密將坐斃之督師大學士楊嗣
昌曰圍師必缺不若空武關一路設伏商維耶均以
待之可一擊而盡也自成乘隙突走諸將不能禦遂

自武關逃入鄖陽息馬深山中時河南大饑饑民所
在爲盜自成乃自鄖均走伊雒饑民從者數萬勢復
大振十二月自成圍永寧雲梯肉薄攻城陷之焚
殺一空殺萬安王采鏗連破四十八寨土賊一掃蕩
等羣盜響應遂陷宜陽衆至數十萬祀縣諸生李巖
爲之謀主賊每以剽掠所獲散濟饑民故所至咸歸
附之其勢益盛

十四年春正月李自成圍河南府福王募死士逆戰
斬獲頗多賊引退賊以大砲環攻城城守嚴不動及

昏而退總兵王紹禹兵有馳而呼于城上者外亦呼而應之紹禹兵卽執副使王胤昌于城上紹禹馳解之諸軍曰賊已在城下卽總鎮其如我何揮刀殺守陣者數人守陣者皆驚墜堞賊緣堞而上叛兵迎之賊遂入賊焚福王府福王及世子俱縋城走士民被殺數十萬執副使王胤昌已下各官皆不死惟一典史不屈見殺河南方大饑通判白尚文墜城死其屍爲饑民所食頃刻盡自成發藩邸及巨室米數萬石金錢數十萬賑饑民先是自成聞福藩最富爲謀已

久適陝西叛兵數百進至河南巡撫招至城中樂器事聞詔逮其首惡數人解京正法叛兵大懼乃陰勾自成襲河南爲內應故一夕而陷丁酉自成跡福王所在執之并執前兵部尙書呂維祺維祺遇王於西關謂王曰名義甚重毋自辱王見自成恐怖泥首乞命自成責數其失遂遇害賊置酒大會以王爲俎爓鹿肉食之號福祿酒維祺罵賊不屈死世子逸走遇亂兵劫之裸而奔于懷慶是時羣盜輻輳自成自稱闖王雄諸賊變聞上震怒遣總兵王紹禹磔之籍

其家。二月李自成搜掘河南富室窖藏，席捲子女，玉帛，捆載入山，以書辦邵時昌為總理官，令守河南府。巡撫李仙風偵賊已去，引兵至城下。時昌閉門拒守，尋開門迎官軍。仙風收時昌斬之。戊午，自成合羣盜圍開封，開封城為宋汴京，金完顏亮益加增築，土堅厚五丈，賊以洞車數百，障壯士多具犁鋤斧鑿，環傳城鑿而穴之。七晝夜不息，鑿之深者四丈有奇。巡按高名衡率司道官嬰城固守，賊兵砲及城中，殺傷相繼。軍餉告匱，周王恭枋出庫金五十萬買米麥。

日夜炊飯，屑麥餉守陴者，復懸金募死士能擊死一賊者，予五十金。兵民踴躍共擊賊，斃者甚衆。賊懼，退數舍。李仙風督諸將高謙等馳至開封，陳永福背城而戰，一日三捷。賊退，開封解嚴。仙風與高名衡互相許奏，詔逮仙風。仙風聞之，自縊。遂以高名衡巡撫河南。壬辰，李自成陷歸德。四月甲子，進陝督丁啓睿兵部尚書代楊嗣昌督師討賊。時嗣昌討賊無功，飲藥死。啓睿督秦師至潼關。左良玉自襄陽進擊李自成，至南陽，自成北出屯於盧氏，永寧寶封舉。

人牛金星向有罪當戍邊降于賊自成以其女爲妻金星驚下者宋獻策善河洛數獻策長不滿三尺見自成獻圖識云十八孩兒當主神器自成大喜拜軍師五月乙亥賀人龍破李自成於靈峽山中高名衡屯開封保定總督楊文岳屯禹州左良玉屯南陽張獻忠羅汝才漸北向思合於自成猛如虎進臨德安黃州疽發背退屯承天癸巳赦兵部尚書傅宗龍出之獄以右侍郎都御史督陝西兵討賊羅汝才不合於張獻忠七月自內鄉瀘川走鄧州與自成

合營時自成有衆五十萬復得汝才軍衆益熾九月張獻忠衆散于南陽以數百騎奔自成自成將殺之汝才以五百騎資獻忠獻忠東奔合回鞏丁丑陝督傅宗龍率兵四萬次新蔡與保督楊文岳之兵會賀人龍李國奇將秦兵虎大威將保定兵其結浮橋渡河合兵趨項城戊寅兩軍畢渡走龍口是日自成汝才亦結浮橋于上流將趨汝寧覘官軍至盡伏精銳松林中陽驅諸賊自浮橋西渡人龍使候騎覘賊還報曰賊渡河向汝矣巳卯宗龍文岳兩軍並進次

孟家庄諸將以士馬俱疲請詰朝戰諸軍遂弛馬中散行墟落以求芻牧賊覘之突起林中搏官軍人龍欽兵不戰國奇迎戰不勝兩軍俱潰人龍大威北奔國奇從之賊以步兵攻二營營以火礮擊却之日暮賊引去保定兵皆潰文岳夜奔項城宗龍獨立營當賊壘壬午飛檄人龍國奇以兵還救二帥不應以兵走陳州宗龍穿塹築壕以拒賊賊亦穿壕二重以困之宗龍兵食盡乃殺馬騾以享軍馬騾復盡殺賊取其屍分噉之辛卯營中火器弓矢俱盡宗龍簡卒尚

有六千夜濕一下潛勒軍突賊營潰圍出諸軍星散宗龍徒步率散卒且戰且走壬辰至項城賊追之破執至城下賊呼於門曰我秦督官軍也請啓門納秦督宗龍大呼曰我秦督也不幸墮賊手左右皆賊耳毋爲所紿賊唾宗龍宗龍罵曰我人臣也殺則殺耳豈能爲賊詐城以緩死賊抽刀擊宗龍中腦而仆復厲聲罵賊斲其耳鼻死城下人龍國奇俱歸陝賊獲衣甲器械無筭遂陷項城屠之分兵屠商水扶溝所在土寇蠶起騷動詔復宗龍兵部尚書太子太保

戊戌督師丁啓睿自商城北發檄左良玉、兵其擊李
 自成、楊文岳招集散亡於陳州、兵稍集、自成、汝才合
 兵陷葉縣、殺守將劉國能、初國能與自成、汝才同為
 賊、結兄弟、十二年左良玉大敗國能於陳州、國能率
 眾萬人、許汝才恨之、誓殺國能、至是聞國能在葉、乘
 勝拔其城、執國能責其負約殺之、詔贈國能左都督
 賊移兵陷泌陽、十月張獻忠糾回鞏左諸賊、自成
 太北行、會李自成、河南諸土寇以兵畢赴、自成眾逾
 百萬、左良玉兵至臨潁、臨潁為賊守、良玉攻破屠

之盡獲賊所掠、自成怒、合兵攻良玉、良玉退保歸城
 自成、汝才圍之、良玉悉兵拒守、賊陷襄城、十一月
 陝西巡撫汪喬年率馬步三萬總兵鄭家棟、牛成虎
 賀人龍將之趨河南、先是喬年于陝西發率自成先
 塚得小蛇、即斬蛇以徇、誓師兼程進兵、以輕騎萬餘
 抵郊縣、時襄城新破、喬年遲疑不敢進、襄城貢士張
 永祺率邑人出迎官軍、屯於城下、自成聞之、解郟城
 之圍來迎戰、喬年安營未定、有二將先逃、官軍大潰
 賊乘之一軍盡覆、喬年以數百人入城、居守五日、襄

城復陷，喬年自刎未殊，被執見殺。自成深恨諸生，遂
剽削百九十人，又購永祺、永祺，匿免屠其族人九家。
殺守將李萬慶，萬慶乃降將射塌天也。自成再破秦
師，獲馬二萬，降秦兵數萬，威鎮河雒，乘勝圍南陽。數
日，城陷，總兵猛如虎死之。唐王遇害，楊文岳屯杞縣，
丁啓睿屯汝寧。太監劉元斌率京軍救河南，聞南陽
陷，乃擁婦女北去。俄上命御史清軍元斌、倉皇悉沈
之于河。十二月，李自成連陷洧川、許州、長葛、鄆陵、
鄆陵，知縣劉振之方誦衣冠北向，再拜自剄。自成

汝才令兵陷禹州，徽王遇害，復圍開封，巡撫高名衡
總兵陳禾福等竭力守禦。周王貯庫金于城頭，禽一
賊者，子百金，斬一首者五十金，戰死者卹其家五十
金，傷者以輕重爲差。殺賊甚衆，永福射中自成左目，
自成屯朱仙鎮，內鄉鎮、平唐縣、新野俱降于賊。鄧州
知州劉振世死焉。

十五年春正月，李自成攻開封益急，洞車附城，鑿城
搏土而空之，廣數尺，實以火藥，燃之一，燄而裂，曰：小
放窟城，縱橫數丈，實火藥，燃之一，發震天，曰：大放，癸

未賊以精騎數千布圍于外，執汴人畜土穴城爲大窟十餘，輦火藥數萬斤，百炬齊燃，賊環甲持矛望城，崩將擁入賊穴，城奮其土礮於外，累累成阜，火藥一發，崩天，輒在皆飛鳴，外智賊之布圍于外者，人馬成血，糜城之未窺者，堅如石，猶尋丈，賊駭解，謂去南陷西華，起孫傳庭兵部侍郎總督陝西兵勦寇。二三月庚午，李自成羅汝才合羣盜八十萬圍陳州，兵備副使關永傑率士民死守，賊周圍四十里，更番進攻，永傑力竭城陷，戰死城上，鄉紳崔必之舉人王受爵等

咸手刃數賊，被執罵賊死，賊怒屠陳州，幸亦陷，雖州陷，大康遂圍歸德府，歸德無兵，民自爲守，乙未賊陷次穴城，城陷，賊乘勝陷寧陵考城。夏四月，孫傳庭檄名諸將于西安，聽令固原總兵鄭家棟臨洮總兵牛成虎接勦，總兵賀人龍各以兵來會，傳庭太集諸將，縛賀人龍坐之旗下而數之，曰：爾奉命入川討寇，開縣譟歸，猛帥以孤軍失利，獻賊出柙，職爾之由，爾爲大帥，遇寇先潰，致秦督秦撫委命賊手，一死不足塞責也。因命斬之，諸將莫不動色，因以人龍兵分隸

諸將刻期進討人龍米脂人初以諸生効用佐督撫
討賊屢殺賊有功總全陝兵叛將劇賊多歸之人龍
推誠以待往往得其効力襄城之後朝廷疑人龍與
賊通密勅傅廷殺之賊聞人龍歿酌酒相慶曰賀風
子歿取關中如拾芥矣 癸亥李自成羅汝才合羣
賊復攻開封先是賊再攻不克士馬多殺傷羣賊畏
憚日逃去數千賊乃申約圍而不攻以坐困之五月
李自成分兵陷開毫六月命侯恂以兵部侍郎總督
援勦官兵討賊與孫傳庭協力援開封七月賊圍開

封久守臣告急詔援勦總兵許定國以山西兵渡河
援之定國兵潰于覃懷己巳督師援勦諸軍潰于河
上時督師丁啓睿保督楊文岳合左良玉虎大威楊
德政方國安諸軍次于開封朱仙鎮與賊壘相望啓
睿督諸軍進戰良玉曰賊鋒方銳未可擊也啓睿曰
汴圖已急豈能持久必擊之諸將咸懼請詰朝戰良
玉以其兵南走襄陽諸軍相次而走督師營亂啓睿
文岳聯騎奔走寧賊渡河逐之追奔四百里喪馬騾
七千兵數萬俱降賊啓睿救書印劍俱失事聞詔逮

啓睿下獄文岳革職聽勘八月開封久困食盡人相
食周王先後捐庫金一百二十餘萬復損歲祿萬石
以養兵國廩空虛宮人咸有饑色詔山東總兵劉澤
清援開封澤清以朱家寨距城八里提兵五千渡河
爲營列水環之達于大堤築甬道以運糧則救援可
濟遂往立營賊攻之三日諸兵不至澤清引兵去時
羅汝才營亦食盡謀他徙自成乃分糧以餽之約破
開封以東隅屬之汝才汝才乃留不去開封城北十
里枕黃河巡撫高名衡樞官黃澍等城守且不支恃

引河水環濠以自固更決隄灌賊可潰也李自成遣
兵攻陷歸德推官王世琰从之九月河決開封賊先
營高處然移營不及亦沉其卒萬人河流直衝入城
勢如山岳自北門入穿東南門出流入渦水水驟長
二丈士民溺歿數十萬巡撫高名衡陳永福咸乘小
舟至城頭周王府第已沒從後山逸出西城樓率宮
眷及諸王露棲城上雨中七日督師侯恂以舟迎王
庚寅總兵卜從善以水師至開封城上推官黃澍從
王乘城夜渡達隄口諸軍列營朱家寨賊乘高據後

以矢石擊汴人之北渡者城中遺民尚餘數萬賊浮舟入城盡掠以去河北諸軍以大礮擊沉其前鋒奪回子女五千人舊河故道清淺不盈尺歸德隔斷在河北邳毫以下皆被其災汴梁佳麗甲中州大隄之上絃管紛咽羣盜心艷之前後三攻汴土馬死者無筭賊積恨矢必拔久懷灌城之謀顧以子女珍寶山積不忍棄之水族憤其城久不下河大決百姓生齒盡屬波臣斷垣澶水上數堞隱見而已黃澍以守禦功詔授御史 回韋左諸賊北合于李自成 孫傳

庭率兵至南陽李自成羅汝才西行逆之傳庭設三覆以待牛成虎將前軍左勦將左鄭嘉棟將右高傑將中軍成虎陽北以誘賊賊奔逐入伏中成虎還兵而鬪高傑董學禮突起翼之左勦鄭嘉棟左右橫擊斬首千餘級賊潰東走追之賊盡棄甲仗軍資于地官軍爭取之無復步伍賊覘官軍置及兵乘之左軍先潰諸軍繼之喪材官將校七十有八人賊倍獲其所喪焉 冬十月李自成復陷南陽屠之回兵屯開封北孫傳庭以兵敗上書自劾詔傳庭圖功自贖自

成汝才合兵趨汝寧 十一月孫傳庭治兵于登封
 賊斬逃帥進兵汝寧賊游兵窺懷慶欲北渡劉澤清
 禦禦之 閏十一月己酉李自成合諸賊圍汝寧監
 軍孔貞會以川兵屯城東楊文岳以保定兵屯城西
 賊兵進攻相拒一晝夜川兵潰保定兵不支庚戌賊
 四面環攻戴屏以障矢石雲梯如牆而立城上矢石
 俱下賊死傷衆而攻不休一鼓百道並登執文岳及
 分巡僉事王世琮于城頭文岳世琮厲聲罵賊賊怒
 縛文岳等以大砲擊之洞胸糜骨以死世琮初殺河

南推官屢却賊射矢貫耳不動號王鐵耳賊屠士
 數萬燔燒邸舍無遺丁巳拔營走確山向襄陽掠崇
 王由橫及世子諸王妃嬪以行 左良玉自朱仙鎮
 南潰久屯襄陽諸降卒附之有衆二十萬其餽于官
 者僅二萬五千餘俱因糧村落襄人不聊生 十二
 月李自成羅汝才合兵四十萬由唐縣而西良玉結
 營襄陽近郊大造戰艦于樊將避賊入郢襄人怨其
 淫掠縱火焚之良玉怒掠荆襄巨佑舟載軍資婦女
 其中而身率諸軍營樊城高阜賊勢既盛襄民咸焚

香牛酒以迎戊辰賊以數萬騎至樊城良王乘高飛
礮擊殺賊千餘騎賊從間道至白馬渡臨江欲渡良
王移營拒之賊不得渡良王拔營而南賊亦不敢逼
自成切齒于良王每戰必力良王懼不敢復與爭鋒
故恒避之郎撫王永祚跳城走己巳襄陽陷賊分兵
陷夷陵宜城荆門向荆州良王全師出漢口遂下武
昌次于金沙洲賊逼荆州甲戌偏沅巡撫陳睿謨棄
荆州奉惠王走湘潭自成遣賊將馬守應據夷陵以
犯豐賀一龍趨德安窺黃麻辛巳自成至荆州士民

迎之賊入荆州荆州諸縣士寇蜂起

十六年春正月李自成圍承天知府開門迎賊巡撫
宋一鶴時守城下城巷戰將士勸之走一鶴不聽揮
刀擊殺賊數人死鍾祥知縣蕭漢有賢聲賊戒其部
曰殺賢令者死無赦乃幽之寺中戒諸僧曰令者死
當屠爾寺僧謹視之漢曰吾盡吾道不變沙法遂自
經賊改承天府曰揚武州遂犯顯陵巡按李振聲守
陵迎降賊賊列之上班振聲自以與賊同姓肩輿出
入營中揚揚自得自成坐陵殿大會羣賊飲天監博

士楊永裕亦降于自成。自成自稱天文禮樂兵法地理俱該洽，請賊發顯陵，忽大聲起山谷，若雷震，賊懼而止。分兵陷潛江、京山諸縣，遣賊將攻德安。乙巳，陷雲夢。丙午，陷孝感。丁未，自成汝才至黃陂，知縣懷印走。賊設偽令，黃陂士民殺偽官，賊怒，反兵攻黃陂，屠之。夷城垣爲平地。戊申，陷景陵。賊別將陷德安，自成馳檄黃州，指斥乘輿，僞托仁義，以誘遠近。黃州守將于允成棄城，順流東下。掠江上客舟，大擾江南北方。國安諸將退屯漢口，賊大隊逼漢陽。左良玉自金沙渚東

下九江，遂至于蕪湖。初，自成流劫秦晉楚豫，攻剽半天下，然志樂狗盜，所至焚蕩屠夷，旣而連陷荆襄鄆郢，席卷河南，有衆百萬，始侈然以爲天下莫與爭。思據有城邑，擅名號矣。羣賊俱奉其號令，推自成爲奉天倡義文武大元帥，號汝才曰代天撫民德威大將軍。自成據襄陽，號曰襄京。其餘所陷郡縣俱改易名號，修襄王宮殿，設官分職。武官有權將軍等九品，文官有太師六政府諸品，封崇王由棖爲襄陽伯，邵陵王在城保寧王紹堯肅寧王術授俱降賊，改封伯。

偽吏政府侍郎喻上猷薦列荊州紳士誠不檄徵之
江陵舉人陳萬策李開先在所薦中偽檄下萬策自
經開先觸牆死楊永裕又勸進牛金星不可乃止
二月庚午李自成遣賊陷麻城城空無人賊回屯德
安自成分兵爲四老回回守承天羅汝才守襄陽革
裏眼往黃州自將其一癸未自成攻郝縣知縣李貞
率士民堅守一晝夜殺傷甚衆賊百道環攻一鼓而
拔縱兵大殺李貞大聲叱賊曰驅百姓死守者知縣
耳安殺何爲罵賊不已自成怒褫其衣倒懸于樹貞

高皇帝有靈我必託之上帝以殺賊賊斷其
香嗣之母齊氏及妻俱歿 三月七未澧州土賊勾
李自成陷常德常德富強甲湖南生齒百萬積粟支
十年巡撫陳睿謨遇賊于郊先奔士民無因志賊遂
陷之自是辰岳諸府相繼俱陷而雲貴路梗矣 丁
酉命大學士吳姓出督師給五萬金旌功以大理評
事萬元吉爲職方員外郎仍充督師軍前營畫兵部
尚書張國維請隨輔臣躬率六軍討賊優詔答之
癸卯李自成襲殺革裏眼左金玉并其衆 甲寅左

良玉引兵自池口西上屯安慶傳制襄承失守明法
具在左良玉憫其久勞行間責令圖功自贖方國安
陳可立革職充爲事官殺賊 夏四月李自成殺羅
汝才并其衆降將惠登相王光恩在鄖陽陰使人招
汝才所部多降之自成怒攻鄖陽登相光恩屢敗
之自成遂築長圍以困鄖丁酉陷保康知縣石惟壇
死之辛丑自成遣賊將以兵十萬至高州守將楊芬
張朗先期具禮迎賊賊諉僞官之任 甲申下詔厲
將士討賊告諭天下 五月河南所在擒斬僞官

李自成在襄陽所造官殿皆傾塌遂屯移鄧州益兵
攻鄖陽王光恩禦之賊屢戰不利孫傳庭復遣高傑
以兵援鄖陽擊賊敗之賊退屯襄陽拘鐵工晝夜造
鐵鉤釘各萬餘謀向潼關踰越山險 戊申上諭輔
臣銓奉命督師討賊自當星馳受事乃三月以來遷
延不進將出都門籌畫不固若在行間何以制勝還
宜在閣佐理不必督師詔趨孫傳庭作速勦寇 丙
辰李自成攻袁時中殺之并其衆 巡撫河南秦所
式上言中州大勢關曹鞏躡五郡八十餘城盡爲瓦

樂及革左諸賊由宛汝踏江漢旬日陷數名郡此流寇之大畧也自永城以至靈閭自宛汝以抵河岍方千里之內皆土賊大者數萬小者數千樓山結寨日事焚掠此土賊之大略也辦賊必須兵舊撫餘兵不及三千陳永福餘兵不及四千合下從善三千人亦不滿萬此王兵之大畧也用兵必裕餉河南五郡淪沒河北強半蒿萊額賦五十萬昨年完不及二十萬撫鎮闕餉五月有餘此糧餉之大略也轉餉必須民自經寇十餘載八州幾斷守城修河轉運至于稚子

猶老婦鳴柝此民生之大略也撫民必須官按除目則有人稽地方則無官或年餘不赴或土團寄命此官吏之大略也敗壞已極惟願皇上速發內帑亟練精銳佐以土寨開荒選牧庶有濟乎時上名係定巡撫徐標入對標曰臣自江淮來數千里見城陷處固蕩然一空卽有完城僅餘四壁蓬蒿滿路鷄犬無音曾未遇一耕者土地人民如今有幾皇上亦何以致治乎上歛歔泣下標又上言屯田及軍戰諸策上善之是月給事中吳其來上言諸撫臣借名護藩

賁棄城走乞救諭各藩并覈王永祚等棄城之罪上不問六月丁丑立賞格購李自成萬金爵通侯購張獻忠五千金官極品世襲錦衣指揮餘各有差進孫傳庭兵部尙書總制應鳳江院豫楚川黔剿寇軍務仍總制三邊鑄督師七省之印李自成大造戰艦于荆襄遣老回回攻常德自成謀自王于荆其親信大帥二十九人分守所陷郡邑自成自隨騎兵五營營精騎二千步兵十四哨哨精卒三千劉宗敏總步白旺總騎每屯以騎兵一營外圍巡徼晝夜更

番除營以次休息警候嚴密人不得逃逸者追獲必磔之營兵不許多攜輜重兵各携妻孥生子棄之不令舉男子十五以上四十以下咸掠爲養子爲奴隸故每破一邑衆輒增數萬每一精兵則蓄役人二十餘其馱載馬驟不與焉衆實五六萬且百萬也雖拔城邑不聽屋居寤處布幕彌望若穹廬其甲縫絲帛數十重有至百者輕而礮矢鏃鉛丸不能入每戰一騎兵必二三馬數易騎終日馳驟而馬不疲嚴寒則掠茵薦布地以籍馬足或剗人腹爲馬槽實以芻

椒飼之飲馬則牽人貫耳流血雜水中馬習見之遇人則嘶鳴思飲噉焉行兵倏忽雖左右不知所往鷄再鳴訕起蓐食韃馬以俟百萬之衆惟自成馬首是瞻席卷而趨遇大川則囊土壅上流雖淮泗諸水亂流而渡百萬合營不携糧隨扞而食飽則棄餘有斷食斷鹽數月者臨陣鐵騎三重反顧則殺之戰不勝馬兵陽北官軍乘之步兵拒戰馬兵繞而合圍無不勝矣以牛金星爲謀主日講經一章史一通每有謀畫集衆計之自成不言可否陰用其長者人多不測

也其攻城分晝夜爲三番以鐵騎布圍步兵肉薄回城人戴鐵冑蒙鐵衣携椎斧鑿城得一甓甃卽還易人以進穴城可容一人則一人匿之參上以出以次相繼遂穿空券側迤四五步留一主樞巨纜繫之去城十百丈牽繩倒柱而城崩矣望風降者不焚殺守一二日殺十三四或五六日不下則必屠矣殺人數萬聚屍爲燎名曰打亮城將陷以兵周布濠外縋城者殺之故城陷必無噍類掠馬驟爲上功次軍仗次幣帛衣服次珍寶其金銀恒散棄之或以代鉛置礮

中屠城則夷其城垣令後莫與爲守立投順牌四九
破城四向負牌至村落降者卽負牌過別村否則加
兵牌所至日蹙千里性慘酷斷耳剔目截指折足剖
心鑿體日以爲常談笑對之其兄從秦軍來自成獲
而殺之性又澹泊食無兼味一妻一妾皆老嫗不蓄
奴僕無子以李雙喜爲養子嗜殺更酷于自成自成
在襄陽以構殿鑄錢皆不成斬一謀士令衛士問紫
姑卜之不吉因立李雙喜爲太子改名洪基以厭之
鑄洪基年爲錢又不成七月間秦督兵將至留毛賊

守襄陽家口自成率精銳往河南 庚子督師孫傳
庭發兵潼關分道進討以總兵牛成虎副將盧光祖
爲前鋒會河南總兵卜從善陳永福合兵洛陽之下
池塞撤左良玉以兵自九江赴汝寧夾擊賊大營移
宛向維詔薊遼總兵白廣恩四州總兵秦翼明入衛
土漢官兵陝西三鎮兵俱隨督師進討傳庭以副總
兵高傑將降丁爲中軍命秦翼明出商雒爲犄角總
兵王定官撫民率綏夏二鎮兵爲後勁八月辛未傳
庭師次闕鄉自成盡發荆襄諸賊俱會于河南步賊

沿河列守自汜水至滎澤伐竹木結筏人泚三葫蘆
將渡河先驅千餘賊北渡總兵劉弘起以兵逐之復
渡南岍丁丑牛成虎率諸將前驅遇賊于洛陽擊破
之再敗之河岍追奔至汝州成虎以孤軍無繼退屯
澠池九月己亥傅庭次汝州偽都尉四天王李養純
率所部來降知賊并兵守寶豐傅庭進軍寶豐合圍
賊堅守不下壬寅自成以輕兵來援戰于城東白廣
恩高傑盧光祖分兵逆戰却之癸卯復以精騎數千
直攻官軍諸將復擊走之傅庭曰寶豐不卽下而賊

天至則腹背受敵矣

傅州牧陳可新等數千

口盡在唐縣賊發精騎

口賊滿營痛哭誓殺官

大雨六日糧車日行二

或勸傅庭旋師就運道

乎要當破一縣就食耳

集縣羊二百餘頃刻八

山西就近餉傅庭軍

批督諸軍悉力攻城拔之斬

級遂以大兵逼唐縣時賊家

來援官軍已入城盡殺賊家

兵壬寅傅庭自朱仙鎮而南

十里之道澤未至士馬俱飢

庭曰軍已行卽還亦飢奚濟

甲辰傅庭復郊縣縣俱窮民

不斂食盡不足給己酉命河北

成將步騎萬餘遊戰官軍前

鋒擊斷自成坐肅進
 時傳庭前鋒盡收革
 諸降賊備悉賊中曲
 戰三北自成奔襄城
 土築塙自守已食匱
 河雒荆襄四戰之地
 也土馬強甲天下據
 險將從浙川間道入
 凌可襲而有也既至

之賊披靡賊營逃亡者相屬
 故部皆致死于賊而高傑統
 初自成遣其弟一隻虎逆戰三
 諸軍進逼之自成累敗而懼挑
 賊有飢色初自成在河南以
 且荒蕪赤地千里關中其故鄉
 之可以霸乃謀西向憚潼關天
 陝如不能則從楚豫下淮安金
 陝州屢敗盡發河上屯守諸賊

以迎官軍驅所掠難
 敵日馳逐數百里河
 不繼丙子自成書巨
 豪傑竝起各保塞以
 顯文劉弘起沈萬登
 集鄉兵數萬扼險隘
 承天老回回屯夷陵
 兩連旬傳廷軍乏餉
 陰通賊癸丑賊率精

式為前鋒以誘敵官軍屢勝輕
 田所在皆荒諸軍既深入饋餉
 行行至官軍刻期會戰時襄洛
 心賊大者萬人少者數千若毛
 日起布衣為將領潛山宋正奇
 賊不敢下承天方國安以兵復
 軍擊敗之諸縣多恢復大
 子兵謀于汝州降盜李際遇
 大至傳庭問計于諸將高傑

請戰白廣恩曰我師困

以薄賊易耳傳庭恐賊

軍耶廣恩不憚引所部

營一紅一白一黑各十

賊伏中賊乘之官軍大

立嶺上望曰不可支矣

隊疾追一日馳走四百

餘人盡喪其軍資數萬

坦曲走河北初賊驅難

宜駐師分據要害步步為營

道曰將軍何怯獨不如高將

八千人先去賊前鋒各三堵

千二百人來薄官軍接戰陷

敗陷泥淖死者數千人高傑

麾眾退諸軍盡西走賊驅大

里至于孟津官軍死四萬

側庭與傑收散亡數千騎渡

式誘官兵斬獲皆良民也傳

庭不知其詐奏賊聞臣名皆驚潰臣誓肅清楚豫不

以一賊遺君父識者憂之至是果敗賊別將克汝州

殺僂過當戊午自成向潼關白廣恩擊破之孫傳庭

亦回軍潼關眾尚四萬十月辛酉朔副總兵沈萬

登復汝寧萬登汝寧大俠也聚鄉勇萬餘人李自成

偽授威武大將軍不受鳳督馬士英承制授副總兵

是日偽將軍馬尚志蒞任萬登潛遣謀入城因擁眾

入誅尚志并諸偽官壬戌一隻虎陷閩鄉即自成

弟李過也疾走至潼關獲督師大燾丙寅賊以蘇給

守關者乘間突入潼關陷李自成間道絲山崖出潼關後夾攻官軍大潰賊既入關西行一隻虎陷華陰傳庭及白廣恩退屯渭南賊合衆數十萬陷渭南傳庭沒于陣知縣楊暄被執不屈賊屠渭南陷華州戊辰陷商州商維道黃世清不屈死之賊屠商州乙丑陷臨潼關中人心所在瓦解陝西巡撫馮師孔知寇棘急入西安收保俄賊至辛未師孔督兵出戰陣陷被執不屈死之西安陷按察使黃炯自盡長安知縣吳從義指揮崔爾達俱投井死秦府長史章世燦

自經死紳士死者甚衆右都御史三原焦源溥罵賊礫死檄州道副使祝萬齡至學宮拜先聖從容自經必禮部主事南居業罵賊死宣撫焦源清發田時震俱不受僞職死御史王道純大罵賊不屈死解元席增光舉人朱謹泉俱投井死山東監軍僉事王徵七日不食死都司吏丘從周罵賊死餘吏民皆相率降于賊總兵白廣恩逃而追獲降之勅自成剽掠十餘年既席捲楚豫始有大志然地四通皆戰場所得郡縣官軍旋復之至是既入秦百二山河遂不可制

自成據秦王府，偽授秦王存樞權將軍世子。紀劉氏曰：國破家亡，願求一死。自成遣歸外家，秦藩富甲天下，擁貲千萬，賊之犯秦也，戶部尚書倪元璐奏曰：天下諸藩無如秦，晉山險用武國也，宜諭兩藩能任殺賊，不妨假之以大將之權，如不知兵，宜悉輸所有與其齋，盜何如享軍，賊平之後，益封兩藩各一子，如親王亦足以報之。兩王獨不鑒十一宗之禍乎？賢王忠而熟于計，必知所處矣。書上不報，至西安陷，秦藩府庫盡為賊有，賊分兵徇諸縣，皆陷，蒲城知縣朱一統

抱印投井死。初，自成在楚，議所向，牛金星請先取河北，直搗京師。楊承裕欲先據留都，斷漕運，獨顧君恩曰：否否，先據留京，勢居下流，難濟大事。其策失之緩，直搗京師，萬一不勝，退無所歸。其策失之急，不如先取關中，為元帥桑梓之邦。且秦都百二山河，已得天下三分之一，建國立業，然後旁畧三邊，資其兵力，攻取山西，後向京師，進退有餘。方為全策。賊從其計，先是賊好殺掠，牛金星勸以不殺，遂嚴戢其下。民間稍安堵，輒相誑惑，人無鬪志。自成遂改西安府為長安。

榜掠巨室助餉。辛未進白廣恩盪寇將軍勦賊時
上信廣恩尚未知其降賊也。李自成分兵畧鄜延
中牟知縣華堦知城小不支先令妻妾自縊一妾年
少遣之其妾亦垂泣投繯華堦遂經歿。官兵進勦
汝寧一路偽官土寇俱盡河南稍寧。庚寅上始聞
潼關失守以兵部侍郎余應桂總督陝西三邊收拾
邊兵相機勦寇。應桂聞命飲泣陛辭曰不益兵餉雖
去何濟上默然。帝金五萬給軍應桂遷延河上不
進。十一月總兵王定高傑自潯南敗各帥所部奔

延安自成命賊將田斌守西安自往塞上甲午高傑
聞賊至以兵渡河而東入山西王定奔榆林自成陷
延安大會羣賊戎馬萬匹旌旗數十里於米脂祭墓
以五百騎按行鳳翔守將誘而殲之自成怒親攻鳳
翔陷之屠其城壬寅李自成發金數萬招榆林諸將
以大寇繼之備兵副使都任及故總兵王世顯侯世
祿侯拱極尤世威惠顯等歛各堡精銳入鎮城大集
將士問之曰若等守乎降乎各言效死無二遂推世
威爲長主號令繕甲兵賊遣偽官說三日不聽賊怒

乙未賊四面環攻城上強弩疊射賊死屍山積更發大砲擊之賊稍却丙午賊攻寧夏鎮兵逆戰三勝之殺賊精銳數千自成歸西安益發賊往寧夏關中諸賊聞寧夏之敗數萬東奔商雒出潼關復散入河南壬子自成復往攻寧夏丁巳李自成陷榆林榆林被圍諸將力戰殺賊賊死者萬人賊攻益力逾旬不克賊以衝車環城穴之城崩數十丈賊擁入城遂陷副使都任闔室自經死總兵尤世威縱火焚其家百口揮刀突戰歿諸將各率所部巷戰殺賊千計賊大至

殺傷殆盡無一降者闔城婦女俱自盡諸將歿事者數百人榆林為天下勁兵處頻年餉絕軍士饑因而殫義殉城志不少挫闔城男子婦女無一人屈節辱身者榆林既屠賊掃寧夏寧夏總兵官撫民迎降三邊俱沒賊無後顧長驅而東矣自成攻慶陽城中堅守四日力不支城陷備兵副使段復興董璠鄉紳太常少卿麻禧歿之屠慶陽執韓玉時賊遣偽王往關東靈閔諸路大張偽榜移檄河南邵縣河南西境賊皆設偽官官兵守懷慶府十二月李自成遣賊入

漢中不克高傑在絳州聞李自成將東渡分道東走
戊辰至蒲州李自成前鋒度河入山西巡撫蔡懋德
先屯平陽至是以歲暮還太原庚辰賊至河津陷平
陽知府張麟然走太原吏民皆降賊殺西河王等三
百人高傑聞平陽陷擁兵東下澤州山西郡縣聞賊
至望風迎款賊遣偽牌徧行山西其辭甚悖李自
成遣賊陷甘州先是鳳翔蘭州開門迎賊賊渡河董
浪涼州二衛俱降遂圍甘州乘夜雪登城巡撫甘肅
林日瑞總兵郭天吉同知藍臺等並死之殺甘民四
萬七千餘人西寧衛尙堅守不下至明年二月詐降
殺偽官賀錦等

十七年春正月李自成稱王于西安僭國號大順改
元永昌自成久覬尊號懼張獻忠老回回相結爲患
旣入秦通好獻忠獻忠厚幣遜詞以報之自成喜遂
僭號牛金星爲丞相更定六政府尙書等偽官三
月乙巳李自成自山西抵京師環攻九門丁未京城
陷帝后崩丙辰遼東總兵平西伯吳三桂聞京師
陷帝后殉難遂縞素發哀乞師于我

天清討賊薄山海關傳檄遠近李自成聞之大驚脅三桂父襄作書招三桂令舊將唐通遺三桂書勸降且言東宮無恙三桂不答上書其父略曰父既不能爲忠臣桂亦安能爲孝子桂與父訣請自今日雖寘斧鑕俎旁以誘三桂不顧也書至自成益懼三桂頓兵山海關以忠義激將吏規取京師唐通不能禦三桂殺賊騎殆盡初三桂諭其下曰吾不忠不孝何顏立天地間欲自刎其下俱曰將軍何至此吾輩當效戰遂大破賊已巳京城外徧張吳三桂檄共約士民編

素復仇一時都人皆密製素幘庚午李自成率兵六萬東行劉宗敏李過等從之挾太子承王定王吳襄自隨太子二王玄幘綠衣各一兵抱之馬上都人擁觀多隕涕甲戌李自成向永平丁丑吳三桂大破賊于關門賊初破京師精銳不過萬數所至虛聲脇下宋常經大敵旣飽掠思歸聞邊兵勁無不寒心自成知成敗決于一戰益驅賊連營並進三桂悉銳出戰無不一當百奮擊殺賊數千人賊亦賈勇疊進自成挾太子登高岡立馬觀戰賊衆三面圍三桂兵三桂

兵東西馳突賊散而復合我

天清兵至繞出三桂右所向披靡莫當自成策馬走諸
賊遂大潰自蹂踐死者數萬人諸軍分道乘之殺其
大帥五人奪輜重無算自成以數千騎急走永平戊
寅自成遣使赴軍中議和三桂曰歸我太子二王速
離京城使鍾真如故而後罷兵自成請旋師如三桂
言求和三桂許之自成接營而西巳卯三桂追賊于
永平又破之賊奔竄還京師毀京城外民居數萬間
弁夷牛馬墻稍遲者殺之凡數萬人三桂兵壅城自

成合兵一十六營以拒戰三桂進攻之連拔其八營

斬首二萬自成殺吳襄首以高竿懸城上盡殺襄家

三十八口三桂披髮墜鞞哭于地三軍感憤怒拔刀

砍地誓殺賊丙戌李自成自稱帝即位于武英殿

偽磁侯劉宗敏扶創出平立不拜曰爾故我等夷也

偽官皆拜宗敏不得已再拜而退丁亥昧爽李自成

出齊化門西走先運薪木積宮內縱火發砲擊毀諸

宮殿又燒九門雉樓火光燭天先是三桂知賊將西

走設疑兵于西山壘取酒罍數千實以石灰夜埋齊

化門道上上覆浮土賊萬馬並馳而出踐躐皆穿馬足驚踏後騎相壓奔石灰迷目不可眎疑兵遠譟以驚之賊陣大亂三桂望城中火作知賊走繞城而西追犇三十里賊馬驟俱重載日行數十里追兵至盡棄其輜重婦女自蘆溝至固安百里盔甲衣服盈路賊兵散去者又數萬三桂徐收所棄已逾數百萬賊既得脫西走三桂復率大兵追賊至保定賊還兵而鬪奮擊破之又追破之于定州北奪其婦女二千獲輜重無筭招降潰賊萬餘人自成屯真定既屢敗憤

極復勒精騎擊三桂三桂兵張兩翼以進擊斬其大將三人首萬級自成大敗還真定益發兵攻三桂三桂接戰自晨至晡未決三桂分兵疊戰自成漸引却自成中流矢墜馬掖而駒馳還營即拔營西走度故關入山西三桂以兵逐之及關而止遂還軍京師

李自成自井陘西行至平陽分兵守山西諸隘益發關中兵西攻漢中陷之李自成復遣兵出潼關攻掠河南又遣降賊叛將馬科至四川略保寧一路吳三桂追賊入山西時西部復攻臨洮甘肅以牽之

自成數戰不勝遂棄山西走西安我

大清兵西伐李自成合賊數十萬悉銳迎戰鐵騎衝堅

而入賊披靡斬首數萬劉宗敏田見秀等俱死賊眾

大潰棄西安走商雒丙子自成棄陝以兵出潼關分

軍為八營三道俱下南畧地至襄郊我

大清兵既定三秦下河南入楚取荆襄李自成南奔辰

州將合張獻忠獻忠已入蜀遂留屯黔陽部賊亡大

半然尚擁眾十餘萬乏食遣賊將四出抄掠黔陽四

境鷄犬皆盡川湖何騰蛟進攻之自成營于羅公山

倚險築壘為久屯計勢彌盛食盡逃者益眾自成自

將輕騎抄掠何騰蛟伏兵邀之大敗殺傷幾盡自成

以數十騎突走村落中求食邨民皆築壘自守合圍

伐破共擊之自成墜左右格鬪皆陷于淖眾擊之入

馬俱斃邨民不知為自成也賊其首獻騰蛟駭之左

驢傷鏃始知為自成李過聞自成歿勒兵隨赴僅奪

其屍滅一邨而還信草為首以表窆葬之羅公山下

賊諸將奉李過為首改名李續渡湖入險山中後改

名李赤心羣盜俱散云

谷應泰曰國以民爲本民以食爲天故曰積貯者天下之大命也史稱關中大祲而三輔寇盜縱橫周官荒政廿二而興大役以業貧民至若青徐歲饑樊崇以起長垣歲凶仙芝作亂蓋揭竿之變往往由于請罄之匱也况乃汰郵驛減冗卒使亡賴奸人無所得衣食則益煽而爲亂走死地如鶩耳崇禎之初銳意崇崇東南畿文西北游徼竝行裁罷而李自成以驍習失職餓民不沾泥等倡亂延安因往從之又與耿如

祀潰兵相合旬月之間衆至萬餘推爲闖將蓋潰兵得飢民則嚮道旣精飢民得潰兵則壁壘益厚又况延緩地連邊鎮俗嫻弓馬民多獷悍秦長西陲雄制列國唐起靈武終復兩京揆之自成起事雖屬毛賊實則勁旅也此時明察之官剽銳之將便當厚集衆師一鼓擒滅比之唐周上書馬元車裂宋賢謀亂虜揚捕斬斯爲得之而乃養寇坐大馴致蔓延此豈非計之失耶雖然自成之起延安也自秦入豫由蜀躡楚轉

寇關東僭號襄鄧十餘年之間曹文詒敗之于
商雒陳奇瑜敗之于漢中左光先敗之于富平
左良玉扼之于武關賀人龍破之于靈陝孫傳
庭敗之于襄城亦未嘗不自縛乞降投縲引決
而究至狼狽豕突灰灰復燃者則以號令非方
輻鈐不飭中朝無良平之謀而行間無李郭之
將也乃者車廂峽之困自成解甲矣而更給
免歿興平武功之捷自成謂阻矣而乃發兵待
撫嶠函合圍之舉自成歸矣而云圍師必缺

又且得臣之猛按劔行誅節度之師同日奔潰
以至嗣昌仰藥于前傅庭陣亡于後而天下事
不可爲矣自成乃更北攻寧夏略定三邊東搗
居庸長驅京邑泊乎祿山陷都惟事聲色黃巢
入篡大掠貲財突令言于宜春坐朱泚于北關
遂使銅駝榛莽鍾簾灰銷自古潢池之禍未有
若斯之酷者也嗟乎彼自成者非有殊才絕力
不過狡黠善騎射耳而謀主牛金星顧君恩
則井窺之智也孽黨劉宗敏白旺等則癘犬之

猛也奈何千丈之隄潰于蟻穴天府之險陷于
困獸哉以予論之假令貨賄屏絕則將必盡材
文法便宜則權不中制而又有武侯以興復自
任晉公以討賊自効者卽寇雖鴟張不難一舉
而撲滅之也然則顛覆之禍固當責之廟筭歟

紀事本末卷之七十九

提督浙江學政僉事豐潤谷應泰編者

男

際第

際辰

訂

甲申之變

懷宗崇禎十七年春正月朔大風霾占曰風從乾起
主暴兵城破鳳陽地震 李自成稱王於西安僭國
號曰順改元永昌賊掠河東河津稷山榮河絳州一
路俱陷自成僞購兵部約戰言三月十日至兵部執

縣者則京師人自涿州還、值逆旅客、予十金、代投以爲詐、斬之上、憂寇臨朝、而歎曰、卿等能無分憂哉、大學士李建泰進曰、主憂如此、臣敢不竭力、臣晉人頗知寇中事、臣願以家財佐軍、可資數月之糧、臣請提兵西行、又曰、進士石隆願單騎走陝北、連甘肅寧夏之兵、外連羌部、召募忠勇、勸輸義餉、勦寇立功否、亦內守西河、扼亢延安、使賊不得東渡、上悅、曰、卿昔行朕當倣占推轂、上欲用石隆、建泰曰、俟臣西行、酌而用之、癸丑夜、星入月中、占云、星入月中、國破君亡。

卯上命大學士李建泰出師、行遣將禮命、馬都尉萬燁以犧牲告太廟、上臨軒廷授建泰節劍、備法駕警蹕、御正陽門、賜宴餞之、命五府掌印侯、內閣六部都察院掌印官及京營總協侍坐、鴻臚贊禮、御史糾儀、大漢將軍侍衛設宴作樂、上親賜卮酒、曰、先生之去、如朕親行、建泰頓首起行、上目送之、良久返駕、是日大風揚沙、占曰、不利行師、建泰御肩輿、不數武杆折、識者憂之、授進士凌嗣職、方司主事、隨輔臣監軍、赦李政修罪、隨輔臣軍前、效用以郭申杰爲副總

兵充督輔中軍旗鼓西洋人湯若望隨行脩火攻水利進士程源私于監軍凌駟曰此行也兼程抵太原收拾三晉猶可濟也若三晉失守無能爲矣建秦出都道聞山西烽火甚急建秦家且破因遲行日三十里師次涿州營兵逃歸者三千人行至廣宗紳衿城守不納攻三日破之殺鄉紳王佐管知縣張弘基是日卽移兵出城初建秦承上寵命恃有家財可佐軍需已聞家破進退失措逡巡畿內而已二月朔上平日視朝忽得偽封啟之其詞甚悖未云限三月望

日至順天會同館暫歇一時相顧失色朝罷遂不復問李自成陷蒲州及汾州懷慶不守福王出奔與太妃相失遂至衛輝依潞王自成至太原太原無重兵爲守山西巡撫蔡懋德着牙下驍將牛勇朱孔訓出戰孔訓傷于砲牛勇陷陣死一軍皆歿城中奪氣賊移檄遠近有云君非甚暗孤立而場蔽恒多臣盡行私比黨而公忠絕少甚至賄通官府朝廷之威福日移利入戚紳間左之脂膏盡竭又云公侯皆食肉統袴而倚爲腹心宦官皆齒糠大豚而借其耳目獄

囚纍纍士無報禮之心征歛重重民有借亡之恨人
讀之多為扼腕蔡懋德知事必不支寫遺表令監紀
賈士璋間道奏京師中軍盛應時見之退歸先殺其
妻子誓將死敵初八日風沙大起賊乘風夜登城懋
德應時策馬赴敵死趙布政毛副使及府縣各官四
十六員咸死之賊屍之于城李自成至黎城他將
陷陝晉上下罪已詔曰朕嗣守鴻緒十有七年深念
上帝陟降之威祖宗付託之重宵旦兢惕罔敢怠荒
乃者災害頻仍流氛日熾忘累世之參養肆廿載之

凶殘赦之益驕撫而輒叛甚至有受其煽惑頓忘敵
愾者朕為民父母不得而卵翼之民為朕赤子不得
而懷保之坐令秦豫丘墟江楚腥穢罪非朕躬誰任
其責所以使民懼鋒鏑蹈水火燼量以罄骸積成丘
者皆朕之過也使民輸芻輓粟居送行齋加賦多無
藝之征預徵有稱貸之苦者又朕之過也使民室如
懸磬田卒汙萊望烟火而無門號冷風而絕命者又
朕之過也使民日月告凶旱潦薦至師旅所處疫癘
為殃上干天地之和下叢室家之怨者又朕之過也

至于任大臣而不法，用小臣而不廉，言官首鼠而議不清，武將驕懦而功不奏，皆由朕撫馭失道，誠感未孚。中夜以思，跼蹐無地。朕自今痛加創艾，深省夙愆，要在惜人才以培元氣，守舊制以息煩囂。行不忍之政以收人心，蠲額外之科以養民力。至於罪廢諸臣，有公忠正直廉潔幹才尚堪用者，不拘文武吏兵二部確核推用。草澤豪傑之士，有恢復一郡一邑者，分官世襲功等開疆，卽陷沒脅從之流，能舍逆反正，率衆來歸，許赦罪立功，能擒斬闖獻，仍予通侯之賞。於

戲忠君愛國人有同心雪耻除凶誰無公憤尚懷祖宗之厚澤助成底定之大功思克厥愆歷告朕意詔下賊前鋒已至大安驛議京師城守賊至忻州官民迎降遂攻代州五臺官吏迎降總兵周遇吉守代州出奇奮擊連戰十餘日殺賊萬餘賊合諸路賊進攻遇吉兵少食盡退守寧武關賊陷懷慶抵固關分趨真定保定督輔李建泰兵過東光不戢士民閉城拒守建泰怒留攻三日破之上至是始聞山西全陷命勅訪諸王遣內官監制各鎮太監高起潛監寧前鎮

盧惟寧監天津通德臨津方正化監真定保定杜勳
監宣府王夢弼監順德彰德閻思印監大名廣平牛
文柄監衛輝懷慶楊茂林監大同李宗允監薊鎮中
協張澤民監西協兵部言各處物力不繼而事權紛
拏反使督撫藉口上不聽真定兵叛降賊知府丘
茂華聞倣先遣家人出城總督徐標執茂華下獄標
麾下中軍伺標登城晝守禦刦標城外殺之出茂華
茂華遂據屬縣叛待寇賊數騎入城收帑籍運京三
百里寂然無言者進魏藻德禮部尚書文淵閣大

學士總督河道屯練往天津進方岳貢戶部尚書兼
兵部尚書文淵閣大學士總督漕運屯練往濟寧魏
藻德辭新銜允之有言各官不可令出山即潛遁遂
止藻德等不遣詔徵天下兵勅王命府部大臣各
條戰守事宜上候於文華殿都察院左都御史李邦
華少詹事項煜右庶子李明睿各言南遷及東宮監
撫南京上驟覽之怒甚曰諸臣平日所言若何今國
家至此無一忠臣義士為朝廷分憂而諱乃若此夫
國君死社稷乃古今之正朕志已定毋復多言吏科

都給事中吳麟徵請棄山海關外寧遠前屯二城徙
吳三桂入關屯宿近郊以衛京師廷臣皆以棄地非
策不敢主其議前總督陝西余應桂奏賊衆號百
萬非天下全力注之不可天下鎮將河南左良玉關
東吳三桂并高傑唐通周遇吉黃得功曹友義馬科
張天祿馬岱劉澤清土國寶劉良佐葛汝芝及副將
丘石碯惠登相王光恩孔希賢金守亮等合之調赴軍
前會師真保之間督撫之外加一督師如史可法王
永吉其人賜以尚方懸公侯之賞以鼓勵之庶賊可

滅也大學士陳演乞休許之賜金幣始上憂秦寇

演謂無足慮至是不自安求去寇薄寧武關傳檄

五日不下且屠總兵周遇吉悉力拒守大砲擊賊萬

餘人會火藥盡或言賊勢重可款也遇吉日戰三日

殺賊月萬若輩何怯耶能勝之一軍盡爲忠義萬一

不支縛我以獻若輩可無恙於是開門奮擊殺賊數

千人賊懼欲退或爲賊策曰我衆彼寡但使主客分

別以十擊一蔑不勝矣請去帽爲識見戴帽者擊之

遁出戰不二日可殲也賊引兵復進迭戰脫帽以目

別我兵大敗。遇吉闔室自焚。揮短刀力鬪。被流矢牙
兵且盡。見執。罵賊賊于市。磔焉。遂屠寧武。嬰襁不遺。
李自成既殺。遇吉嘆曰。使守將盡。周將軍者。吾安得
至此。寇犯大同。兵民皆欲降。命城守不應。總兵朱
三樂自刎。巡撫衛景瑗督理糧儲。戶部郎中徐有聲
朱家仕俱死之。文學李昔葵闔家九人自縊。先題曰
正門完節。李自成入大同。六日殺代府宗室殆盡。留
偽將張天琳守之。天琳殺慘凶暴。閱兩月。陽和軍民
約鎮城軍民內應。殺天琳。二月己丑。命部院嚴備

司捕各官。譏察奸宄。申嚴保甲。巷設邏卒。禁夜行。巡
視倉庫草場。魏藻德請自出京議餉。不許。召兵部尚
書張國維。庶吉士史可程。進士朱長治。陳川。諸生張
鐸于中。左門鑾言三策。首請太子監國。南京擇耆臣
輔之。宣府告急。命鎮朔將軍王承胤領寇所向。庚
寅。召文武大臣科道于中。極殿問今日方畧。奏對可
三十餘人。有言守門乏員。當今之急。無如考選科道
餘皆練兵。加餉習聞也。是日命內監分守九門。稽出
入。京城武備稍弛。禁兵皆南征。太倉久罄。至是命襄

城伯李國楨提督城守守西直門各門勳臣一卿亞
二論文武各官輪助初議僉民兵魏藻德曰民畏賊
如一人走大事去矣上然之禁民上城辛卯督師大
學士李建泰上書請駕南遷願奉太子先行壬辰上
召對平臺論閣臣曰李建泰有疏勸朕南遷國君死
社稷朕將何往大學士范景文左都御史李邦華少
詹事項煜請先奉太子撫軍江南兵科給事中光時
亨大聲曰奉太子往南諸臣意欲何為將欲為唐肅
宗靈武故事乎景文等遂不敢言上復問戰守之策

衆臣默然上嘆曰朕非亡國之君諸臣盡亡國之臣
爾遂拂袖起 欽天監奏帝星下移 詔封總兵吳
三桂平西伯左良玉寧南伯唐通定西伯黃得功靖
南伯給敕印劉澤清實陞一級劉良佐周遇吉高傑
馬岳馬科姜宜孔希貴黃蜚葛汝芝高第許定國王
承胤劉芳名李棲鳳曹友義杜允登趙光遠卜從吉
楊御蕃各陞署一級督撫馬士英王永吉黎玉田李
希沆分別應加實署始棄寧遠徵吳三桂王永吉率
兵入衛又召唐通劉澤清率兵入衛澤清前命移鎮

彰德因縱掠臨清南奔惟唐通以八千人入衛已同
 太監杜之秩守居庸 賊犯保定大學士李建泰已
 病中軍郭中傑縋城降賊兵潰賊入保定建泰被執
 御史金毓峒守西門賊執之入三皇廟見賊帥毓峒
 奮拳毆賊帥仆之躍入井中死妻王氏自經毓峒從
 子振孫以武舉效力行間登城射賊多應弦而斃城
 陷眾解戎衣自匿振孫王禰禡大呼曰我御史金毓
 峒姪也賊支解之毓峒子罍婦陳氏年十八與其祖
 母張母楊嫂常一時盡投于井張抱孫于懷同下侍

姪四人亦從下 乙未命太監馬思理馳赴大同督

兵援勦 李自成宿陽和遂長驅向宣府宣府叛將

白廣恩貽總兵姜瓖書約降監視太監杜勳緋袍八

鬻郊迎三十里軍民聚謀籍籍巡撫朱之馮懸賞募

軍守城無一應者三命之咸叩頭曰願中丞聽軍民

納款之馮獨行巡城見大砲曰汝曹試發之可殺數

百人賊雖殺我無恨矣眾又不應之馮不得已乃自

起烽火兵民競挽其手之馮乃奪士卒刀自刎宣府

軍民俱迎降于賊鄉紳張羅彥自殺 上按籍勳賊

大瑞後其助餉遣太監徐高論嘉定伯周奎為倡奎謝無有高泣論再三奎漫詞以對高拂然起曰外戚如此國事去矣多金何益奎奏捐萬金上少之勒其二萬奎密書皇后求助后勉應以五千金令奎以私蓄足其額奎匿中官所畀二千金僅輸三千金太監王永祚曹化淳助至三萬五萬王之心最富上面論之僅獻萬金諸內官各大書于門曰此房急賣復雜出雕鏤玩好諸物陳于市以求售後賊拷王之心追十五萬他金銀器玩稱是周奎抄見銀五十二萬珍

船復數十萬魏藻德首輸百金陳演既放未行召入訴清者百官其議捐助勉論至再最後每省限額浙江六千山東四千先後共二十萬時論上等三萬金皆無應惟太康伯張國紀輸二萬餘不及也又議前三門巨室各輸糧給軍且贍其妻孥使無內顧諸巨室多不樂而止或謂從逆官吏多非其心請赦河南北所俘偽官以携賊黨丙申大風霾晝晦命司禮太監王承恩提督內外京城總督薊遼王承吉節制各鎮俱聽便宜行事賊警益逼有勸上南遷者上怒

日卿等平日蓄營門戶今日死守夫復何言論兵部
曰都城守備有餘援兵四集何難刻期滅寇敢有訛
言惑衆及私發家眷出城者擒治 庚子土召對惟
問兵餉以舉朝無人常泣下廷臣長策惟閉門止出
入餘無一籌議增兵外城則內關增兵內城則外關
襄城伯李國禎在事亦不敢抗王承恩 辛丑分營
都門設大砲上又召對羣臣問禦寇方畧諸臣皆囁
嚅不能對廷臣舉兵部職方可員外萬元吉知兵筭
任司馬 給九門守者人百錢召前太監曹化淳可

守城 南京孝陵夜哭 癸卯風晦寇自柳溝抵居

庸關柳溝天塹百人可守竟不設備總兵唐通大監
杜之秩迎降撫臣何謙偽死私遁總兵馬岱自殺其
妻子疾走山海關時京師以西諸郡縣望風瓦解將
吏或降或遁偽權將軍移檄至京師去十八日至幽
州會同館暫繳京師大震詔三大營屯齊化門外
甲辰賊陷昌平州諸軍皆降總兵李守鐔罵賊不屈
手格殺數人不能執諸賊圍之守鐔拔刀自刎賊
焚十二陵享殿傳倣至京師先是上知寇倣益急下

吳麟徵請徙寧遂疏飛檄趣三桂入關三桂徙五十萬衆日行數十里是日始及關賊騎已過昌平矣太監高起潛棄關走西山賊分兵掠通州糧儲上方御殿召考選諸臣問裕餉安人滋陽知縣黃國琦對中旨授給事中餉以次對未及半密封入上覽之色變卽起入諸臣立候移刻命俱退始知爲昌平失守也是夜賊自沙河而進直犯平則門竟夜焚掠火光燭天京師內外城堞凡十五萬四千有奇京營兵疫其精銳又太監邊去登陴羸弱五六萬人內關數千人

守陴不充無炊具市飯爲餐餉久闕僅人給百錢無不解體而賊自破中原旋收秦晉久窺畿輔空虛潛遣具黨輦金錢瓊屬飾爲大賈列肆于都門更遣奸黨挾賁充衙門掾史專刺陰事纖悉必知都中日遣撥馬探之賊黨卽指示告賊賊掠之入營厚賄結之撥馬多降賊無一騎還者有數百騎至齊化門迤平則門而西營兵屯近郊者詰之曰陽和兵之勤王者實皆賊候騎也時人心洶洶皆言天子南狩有內官數十騎擁護出得勝門矣守門皆內官爲政卿貳勳

戚不得上乙巳昧爽開西直門納避難者內官坐城上以令箭下門立敢無敢詰問勳戚大臣惟坐視而已上早朝召對諸臣而泣俛首書御案十二字以示司禮監王之心尋拭去漏下已刻急足叩城下曰遠塵衝天寇深矣守城內臣使騎探之報曰哨騎也不爲意且午有五六十騎彎弓貫矢大呼開門守卒亟發砲斃二十騎難民死數十人門始閉須臾賊大至方報過蘆溝橋俄攻平則彰義等門矣城外三大營皆潰降火車巨礮蒺藜鹿角皆爲賊有賊反礮

攻城轟聲震地京軍五月無餉一時驅守率多不至每堵一人多不及諸臣方侍班襄城伯李國楨匹馬馳闕下汗浹霑衣內侍呵止之國楨曰此何時也君臣卽求相見不可多得矣內臣叩之曰守軍不用命輒一人起一人復臥如故上召入因命內臣俱守城譚曰諸文武何爲且言官止內操我甲械俱無奈何或曰我輩月食五十萬效死固當乃請如已巳歲所派數俱乘城凡數千人上括中外庫金二十萬犒軍是日細民有痛哭輸金者或三百金或四百金各授

錦衣衛千戶丙午寇攻城礮聲不絕流矢雨集仰語
守兵曰亟開門否且屠矣守者懼空礮向外不實鉛
子徒以硝磺鳴之猶揮手示賊賊稍退礮乃發賊驅
居民負木石填濠急攻我發萬人敵大砲誤傷數十
人守者驚潰盡傳城陷閣城號哭奔竄賊駕飛梯攻
西直平則德化三門勢甚危急太常少卿吳麟徵累
土填西直門因單騎馳入西安門吏部侍郎沈惟炳
守門曰內守有宦寺百官不得入奈何麟徵排門而
入太監王德化語麟徵曰守城人少奈何請增蓋之

麟徵至午門遇大學士魏藻德止之曰兵部調度兵
餉已足公何事張皇即藻德且出閣上方休公安從
入麟徵流涕固請得以非時見藻德挽之出是日封
劉澤清東平伯時左諭德楊士聰衛胤文入直語閣
臣左良玉吳三桂俱封而遺劉清澤且臨清地近可
虞也閣揭上得封都察院左都御史李邦華至正陽
欲登城中貴拒之李自成對彰義門設座晉王代王
左右席地坐太監杜勳侍其下呼城上人莫射我杜
勳也可縋下一人以語守者曰留一人下爲質請公

上勲曰我杜勲無所畏何質爲提督太監王承恩繼之上同入見大內盛稱賊勢重皇上可自爲計守陵太監申芝秀自昌平降賊亦繼上入見備述賊犯上不道語請遜位上怒叱之諸內臣請留勲勲曰有秦晉二王爲質不反則二王不免矣乃縱之出仍繼下勲語守瑞王則堯稽憲章輩曰吾當富貴自在也初聞勲殉難贈司禮監太監庶錦衣衛指揮僉事立祠至是方知勲固從賊爲逆也兵部尚書張縉彥奏曰時勢如此危急臣屢至城闕欲覘城上守禦

視抑沮今聞曹化淳王化成繼賊杜勲上城未知何意恐有好究不測章上手書遣縉彥上城按之至城內監沮之如故示以上傳始登問杜勲安在云昨暮上今晨下之已上聞無容致詰又曰尚有秦晉二王在城下亦欲通語縉彥曰秦晉二王旣降寇如何可上化淳拂衣去因闢城上守卒寥寥兵部侍郎王家彥痛哭云賊勢如此監視將營兵調去李襄城處尚有十之四家彥所守兩堵僅一卒語未竟城下坎墻聲急太監王承恩砲擊之連斃數人化淳化成飲

酒自若。縉彥馳至內閣約同奏至宮門傳止之。上下
詔親征。召駙馬都尉鞏永固謀以家丁護太子南行。
對曰：臣等安敢私蓄家丁。卽有之何足當賊。乃罷已。
召王承恩。亟飭內員備親征。申刻彰義門啟蓋。大監
曹化淳獻城關門也。賊恣殺掠。前太學士蔣德璟宿
會館被劔。上亟召閣臣入曰：卿等知外城破乎。曰不
知。上曰：事亟矣。今出何策。俱曰：陛下之福自當亡。慮
如其不利。臣等巷戰誓不負國。命退。是夕上不能寢。
內城陷。一闔奔告。上曰：大營兵安在。李國禎何往。答

曰：大營兵散矣。皇上宜急走。其人卽出呼之。不應。上
卽同王承恩幸南宮。登萬歲山望烽火燭天徘徊踰
時。回乾清宮。殊書諭內閣命成國公朱純臣提督內
外諸軍事。來輔東宮。內臣持至閣。因命進酒。連沃數
甃。嘆曰：苦我民爾。以太子永王定王分送外戚周田
二氏。語皇后曰：大事去矣。各泣下。宮人環泣。上揮去。
令各爲計。皇后頓首曰：妾事陛下十有八年。卒不聽
一語。至有今日。皇后抱太子。二王慟甚。遣之出。后自
經。上召公主至。年十五。嘆曰：爾何生我家。左袖掩面。

右揮刀斷左臂。未殊死。手慄而止。命袁貴妃自經。繫
絕久之。蘇上拔劔刃其肩。又刃所御妃嬪數人。召王
承恩對飲。少頃。易靴出中南門。手持三眼鎗。雜內豎
數十人。皆騎而持斧。出東華門。內監守城。疑有內變。
施矢石相向。時成國公朱純。臣守齊化門。因至其第。
闔人辭焉。上太息而去。走安定門。門堅不可啟。天且
曙矣。帝御前殿。鳴鐘集百官。無一至者。遂仍回南宮。
登萬歲山之壽皇亭。自經。亭新成。所闕內。操處也。太
監王承恩對縊。上披髮御藍衣。跣左足。右朱履。衣前

書曰。朕自登極十七年。逆賊直逼京師。雖朕薄德。匪
躬。上干天咎。然皆諸臣之誤。朕也。朕死無面目見祖
宗于地下。去朕冠冕。以髮覆面。任賊分裂。朕屍勿傷
百姓一人。又書一行。百官俱赴東宮行在。猶謂閣臣
已得殊論也。不知內臣持殊論至閣。閣臣已散。置几
上而反。文武羣臣無一人知者。丁未昧爽。天忽雨。
俄微雪。須臾城陷。賊先入東直門。殺守門御史王章。
守卒蟻墜。兵部侍郎張伯鯨走匿民舍。賊騎塞巷。大
呼民間速獻驃馬。賊經象房橋。羣象哀鳴。淚下如雨。

內臣前導兵部侍郎王家彥自經于民舍大學士魏藻德等未聞變猶傳單釀金方岳貢范景文方傳導至西長安門亟還賊于騎入正陽門投矢令人持歸閉門得免死於是俱門書順民太子走詣厨奎第奎臥未起叩門不得入因走匿內官外舍上之出至南宮也使人詣懿安皇后所勸后自裁倉卒不得達兩宮已自盡宮人號泣出走宮中大亂懿安皇后青衣蒙頭徒步走入成國公第尚衣監何新入宮見長公主斷肩仆地與宮人救之而甦公主曰父皇賜我死

我何敢偷生何新曰賊已將入恐公主遭其辱且至國丈府中避之乃負之出午刻李自成增蓋纒衣乘烏駿馬偽丞相牛金星尚書宋企郊等五騎從之特宮中大亂諸賊帥率其騎皆擐甲執兵先入清宮諸宮人逸出遇賊復入宮人魏氏大呼曰賊入大內我輩必遭所汚有志者早為計遂躍入御河死頃間從死者積一二百人自成自西長安門入彎弓仰天大笑手發一矢中坊之南偏至承天門自成顧盼自得復彎弓指門榜語諸賊曰我一矢中其中字必一統

射之不中中。中。天。字。下。自。成。愕。然。牛。金。星。趨。而。進。曰。中。其。下。當。中。分。天。下。自。成。喜。投。弓。而。笑。司。禮。視。即。太。監。王。德。化。以。內。員。三。百。人。先。迎。德。勝。門。令。仍。舊。任。各。監。局。即。官。迎。亦。如。之。因。集。選。百。餘。人。餘。皆。散。去。自。成。入。官。問。帝。所。在。大。索。宮。中。不。得。偽。尚。璽。卿。黎。某。進。曰。此。必。匿。民。間。非。重。賞。嚴。誅。不。可。得。今。日。大。事。不。可。忽。也。乃。下。令。獻。帝。者。賞。萬。金。封。伯。爵。匿。者。夷。族。自。成。登。皇。極。殿。據。繡。座。牛。金。星。檄。召。百。官。期。二。十。一。日。俱。集。于。朝。禁。民。間。諱。自。成。絲。字。自。成。同。僞。都。督。劉。宗。敏。等。數。

十騎入大內。太監杜之秩。曹化淳等前導自成。責其背主。當斬。秩等叩首曰。識天命。故至此。自成叱去之。賊分宮嬪各三十人。牛金星軍師宋獻策等。亦各數人。宮人費氏年十六。投簪并賊釣出之。見其姿容。爭相奪。費氏給曰。我長公主也。若不得無禮。必告汝主。羣賊擁之。見自成。且成命內官審之。非是。賞部校羅賊羅。携出。費氏復給曰。我實天潢之胤。義難苟合。惟將軍擇吉成禮。死生惟命。賊喜置酒。極歡。費氏懷利刃。俟賊醉。斷其喉。立死。因自刎。自成大驚。令收葬之。


內臣獻太子自成留之西宮封爲宋王太子不爲
屈辛亥改殯先帝后出梓宮二以丹漆殯先帝黝漆
殯先后加帝翼善冠衮玉滲金靴后袍帶亦如之

谷應泰曰粵楷懷宗以戊辰卽位而李自成諸
賊卽以是歲起延安禍本相尋若與俱始焉自
茲以後懷宗未明求衣徵兵檄餉日以討賊爲
事而自成輩蹶而復振有同烏獸之散忽若鷲
鳥之聚遂使民勞板蕩將賞妖氛益至十七年
之久而黃巢直逼關門赤眉大入內地雖有智

者又安所謀禦哉乃若正旦風霾孝陵夜哭
恒星八月帝曜下移則天變見矣又若借號咸
陽畧據太原突入居庸驟窺畿輔則地險失矣
更若勤王之徵徵者未赴罪已之詔聞者不感
飾賈吏于輦下而機務盡輸誘撥馬於營中而
偵刺鮮實則人事去矣當此之時苟且以自救
忍耻以圖存者止三策耳余應桂請會師真保
吳麟徵請徙師入衛范景文李邦華請遷國南
都此其可行者也然而發言盈庭是用不集者

智。神。于。晚。圖。而。事。乖。于。窘。步。也。卒。之。北。門。鎖。鑰。
盡。發。豕。鬮。東。閣。鼎。鑪。徒。聞。肉。食。帑。乏。瓊。林。之。聚。
兵。多。邢。父。之。呼。奪。禁。門。而。不。啟。幸。戚。里。而。却。返。
斯。時。虞。淵。日。墜。空。想。揮。戈。周。鼎。天。移。誰。能。沒。水。
蓋。至。後。官。賜。畫。三。王。出。奔。國。破。家。亡。既。血。飛。于。
繡。襪。生。人。死。別。又。腸。斷。于。桓。山。豈。非。涉。亂。世。而。
多。艱。牛。皇。家。而。不。守。者。乎。更。可。哀。者。酌。卮。內。殿。
望。火。南。宮。殺。身。取。義。皆。從。青。蓋。之。占。披。髮。投。繯。
不。入。景。陽。之。井。然。且。沃。屍。可。裂。民。命。毋。為。恨。結。

幽。泉。言。存。衣。帶。語。云。國。君。死。社。稷。又。云。亡。國。正。
其。終。宜。乎。蓐。蠶。之。誓。御。誓。欲。前。驅。而。菱。舍。之。火。
夫。相。從。地。下。也。然。而。致。禍。有。由。因。衰。激。極。彼。周。
業。衰。于。幽。厲。不。在。愚。狐。漢。道。替。于。桓。靈。豈。關。蜀。
郡。故。明。不。亡。于。武。皇。者。以。孝。宗。之。蘊。澤。厚。而。明。
無。救。于。懷。帝。者。以。喜。廟。之。留。壽。長。也。乃。論。者。又。
以。善。善。惡。惡。郭。公。致。亂。知。人。則。哲。帝。堯。所。難。仰。
懷。宗。遺。詔。亦。以。諸。臣。誤。國。理。或。有。然。爾。



紀事本末卷之八十

提督浙江學政僉事豐澗谷應泰編著

男 際第

際辰 訂

甲申殉難

懷宗崇禎十七年三月十九日丁未賊李自成陷京師帝崩于煤山大學士兼工部尚書范景文死之初賊犯都城景文知事不可為嘆曰身為大臣不能從疆場少樹功伐雖死奚益十八日召對已不食三日

矣飲泣人告聲不能續翌日城陷景文望闕再拜自
經家人解之乃賦詩二首潛赴龍泉巷古井死其妾
亦自經

戶部尚書兼侍讀學士倪元璐聞難曰國家至此臣
死有餘責乃衣冠向闕北謝天子南謝母索酒招二
友爲別酬漢壽亭侯像前遂投繯題几案云南都尚
可爲死吾分也慎勿棺衾以志吾痛因語家人曰若
卽欲殮必大行殮方收吾屍乃縊死三日後賊突入
見之顏色如生賊驚避他去一門殉節共十有三人

左都御史李邦華聞難嘆曰主辱臣死臣之分也夫
復何辭但得爲東宮導一去路死庶可無憾已矣勢
不可爲矣乃題閣門曰堂堂丈夫聖賢爲徒忠孝大
節矢死靡他乃走文丞相祠再拜自經祠中賊至見
其冠帶危坐爭前執之乃知其死驚避去

左副都御史施邦曜聞變慟哭題詞于几曰愧無半
策匡時難但有微軀報主恩遂自縊僕解之復蘇邦
曜叱曰若知大義毋久留我死乃更飲藥而卒
大理寺卿凌義渠聞難以首觸柱流血破面盡焚其

生平所著述及評騭諸書服緋正笏望闕拜復南向
拜訖遺書上其父有曰盡忠卽所以盡孝能死庶不
辱父乃繫帛奮身絕吭而死

協理京營兵部右侍郎王家彥賊犯都城奉命守得
勝門城陷家彥自投城下不死折臂足其僕掖入民
舍自縊死賊燔民舍焚其一臂僕收其遺骸歸

刑部右侍郎孟兆祥賊犯都城奉命守正陽門賊至
死于門下妻何氏亦死其子進士章明收葬父屍亟
歸別其妻王氏曰吾不忍大人獨死吾往從大人妻

曰爾死吾亦死章明以頭踰地曰謝夫人然夫人須
先死乃遣其家人盡出止留一婢在側章明視妻縊
取筆作詩已復大書壁曰有侮吾夫婦屍者吾必爲
厲鬼殺之妻氣絕取一扉置上加緋服文取一扉置
妻左亦服緋目縊囑婢曰吾死亦置扉上遂死

左諭德馬世奇是日方蚤食聞變曰是當死家人曰
奈太夫人何世奇曰正恐辱太夫人耳遂作書別母
侍妾朱氏李氏盛服前世奇曰若離我去耶二妾言
主人盡節吾二人亦欲盡節拜辭已並入室自縊世

奇亦遂縊。家人救之，復蘇。告曰：聞聖駕已南，幸矣。可爲從亡計。世奇不應。睹二妾已死，笑曰：若年少，遂能死乎？乃朝服捧勅北面再拜，取冠帶焚之，于庭以司經局印置案上。囑僕曰：上如出幸，以此上行。在否則投之吏部。復南向拜母，端坐引帛力自縊死。

左中允劉理順賊入城，理順題于壁曰：成仁取義，孔孟所傳。文信踐之，吾何不然？酌酒自盡。其妻萬氏妾李氏及子孝廉，并婢僕十八人闔門縊死。賊多河南人，至其居曰：此吾鄉杞縣劉狀元也。居鄉厚德，吾軍

奉李將軍令，護衛公何遽死也？數百人下拜泣涕而去。時謂臣死君妻死，夫子死，父僕死，主一家殉難者，以劉狀元爲最。

太常少卿吳麟徵奉命守西直門，賊勢急，同守者相繼避去。麟徵遺友人書曰：時事決裂，一旦至此，同官潛身遠害，某惟致命遂志自矢而已。丁未城陷，徒步歸賊。已據其邸，因入道左三元祠。時傳天子蒙塵，有勸公南歸不應。同官來招之降，賊怒揮之戶外，遂自經。家人救之，甦泣而請曰：明旦待祝孝廉，至可一訣。

麟徵許之先是祝孝廉淵以奏保劉宗周被逮留京師淵晨至麟徵酌酒慷慨與別曰自我登第時夢見隱士劉宗周題文信國零丁洋詩二語于壁數實爲之今老矣山河破碎不死何爲相對泣數行下因作書訣家人曰祖宗二百七十年宗社一旦而失身居諫垣無所匡救法應禡服殮時用角巾青衫覆以單衾籍以布席是矣茫茫泉路咽咽寸心所以瞑予目者又不在乎此也罪臣吳麟徵絕筆書畢投繯死之淵爲視舍殮乃去

右庶子周鳳翔帝崩梓宮暴露東華門外鳳翔赴哭慟絕歸寓遺書訣父有曰男今日幸不虧辱此身貽兩大人羞吾事畢矣罔極之恩無以爲報矢之來生復作詩一首有碧血九泉依聖主白頭二老哭忠魂之句向闕再拜自縊二妾從之俱死

簡討汪偉先是聞賊漸近都城遺書友人曰京師單弱不惟不能戰亦不能守一死外無他計也及賊犯闕偉恫瘁累日不食妻耿氏從容語曰苟事不測請從君共死丁未城陷偉趨吳給事甘來所約同殉難

歸與妻耿氏呼酒命酌偉大書前人語于壁曰志不可屈身不可降夫婦同死節義成雙爲兩纒于梁間偉就右耿氏就左旣皆縊耿氏復揮曰止止雖在顛沛夫婦之序不可失也復解纒正左右序而死

戶科給事中吳甘來賊薄京師兄禮部員外泰來至寓執甘來手泣曰事勢至此奈何甘來曰有死無二義也城陷傳聞聖駕南出甘來曰上明且決必不輕出乃疾趨皇城不得入返寓家人進飲食却之有勸甘來潛遁者甘來曰今不能調兵殺賊顧欲苟全求

活耶遂作書以後事囑其兄弟簡几上有疏草在曰留此恐彰君過取火焚之兄子家儀奔至相與慟哭曰我不死無以見志汝父死無以終養古者兄弟間難必存其一使皇上在則土木袁彬遜國程濟皆可爲也否則求真入于白水起謝輅于有仍是我雖死猶生也努力免之遂冠帶北向拜者五南向拜者四賦絕命詩一首引佩帶自縊死

監察御史王章賊犯京師章與給事中光時亨同巡城至阜城門賊緣堞而上從入駭走賊持刃問曰降

否章叱之曰不降賊以刃築其膝仆地遂遇害章子之拭後亦死難于閩甚烈與章同

監察御史陳良謨聞變痛飲作詩爲纒于梁欲自盡妾時氏有娠良謨謂之曰吾年踰五十無子汝幸有娠倘生男以延陳氏血食汝必勉之時氏曰主人死妾將誰依與其爲賊辱不如無子也妾請先死以絕君念遂入投纒良謨別作一纒與之同盡

監察御史陳純德時提督北直學校行部至易水試士未竟聞都城賊警卽戒裝入都不數日城陷自縊

死之

四川道御史趙譔巡視中城捕賊謀殺之城陷賊獲譔譔瞑目大罵賊怒殺于白帽衲衲

太僕寺丞申佳胤聞城陷投井死

吏部員外郎許直都城陷時傳先帝從齊化門出有客勸曰天子南遷公等宜扈蹕偕行共圖光復直附之旣而出門一望曰當此四面于戈駕將焉往比聞帝崩號慟幾絕有客從旁慰解動以親老子幼直曰有兄在吾無憂也是夜爲書報其父作詩六章起拜

關已復拜父畢自縊死之一手持繩尾一手上握神氣如生

兵部郎中成德賊報急卽致書同年馬世奇曰主憂臣辱我等不能匡救貽禍至此惟有一死以報國耳君常忠孝風稟諒有同心也及帝崩梓宮暴露東華門德以雞酒哭奠梓宮前賊怒露刃脅視之不爲動歸寓跪母張氏前慟哭母曰我知之矣入室自縊死妻張氏亦死一子六歲德撲殺之然後自殺

兵部員外郎金鉉賊攻城急鉉跪母章氏前曰兒世受國恩職任車駕城破義在必死得一僻地可以藏母幸速去母曰爾受國恩我獨不受國恩耶事急廡下井是吾死所鉉慟哭卽辭母往視事丁未歸至御河橋聞城陷鉉望寓再拜卽投入御河從人拯救鉉嚙其臂急赴深處時河淺悅首泥濘死之家人報至母章氏亦投井死鉉妾王氏亦隨死其弟諸生錄哭曰母死我必從死然母未歸土未敢死也遂棺殮其母旣葬三日復投井而死

光祿寺署丞于騰蛟冠帶呼妻亦衣命服同縊死

副兵馬使姚成中書舍人宋天顯皆自盡

中書舍人滕之所阮文貴經歷張應選咸投御河死
儒士張世禧二子懋賞懋官父子俱自經死又萊備
湯之瓊見先帝梓宮過慟哭觸石死

襄城伯李國楨賊李自成昇帝后梓宮于東華門外
設廠百官過者莫進視國楨洗首去幘踉蹌奔赴跪
梓宮前大哭賊執國楨見自成復大哭以頭觸階血
流被面賊衆持之自成以好語誘國楨使降國楨曰
有三事爾從我卽降一祖宗陵寢不可發一須葬先

帝以天子禮一大子三王不可害自成悉諾之扶出
賊以天子禮藁葬先帝于山貴妃墓惟國楨一人斬
衰徒步往墓至陵襄事畢慟哭作詩數章遂于帝后
寢前自縊死之

新樂侯劉文炳賊破外城帝居文炳同駙馬鞏永固
各率家下二十餘人欲于崇文門圍出不得乃回
宮文炳嘆曰身爲賊臣義不受辱不可不與國同難
其女弟適李年未三十而寡文炳召之歸城陷與弟
左都督文耀擇一大井驅子孫男女及其妹十六人

盡投其中縱火焚賜第火燃俱投火死祖母瀛國太夫人即帝外祖母也年九十餘亦投井死

駙馬都督鞏永固從帝突圍出不得歸家殺其愛馬焚其弓刀鎧仗大書于壁曰世受國恩身不可辱時樂安公主先薨以黃繩縛子女五人于柱命外舉火遂自剄從之

太傅惠安伯張慶孫聞城陷盡散財物與親戚置酒一家聚飲積薪四圍全家燔死

宣城伯衛時春聞變合家赴井死無一存者

錦衣衛都指揮使王國興聞變自縊死

錦衣衛指揮同知李若珪守崇文門城陷作絕命詞云死矣即爲今日事悲哉何必後人知自縊死

錦衣衛千戶高文采守宣武門城陷一家十七人皆自殺屍狼籍于路

順天府知事陳貞達自盡

陽和衛經歷毛維張不屈死

次監王承恩從帝于煤山帝崩承恩再拜慟哭退而自縊于亭下與大行相望

百戶王某周鍾寓其家百戶勸鍾死鍾不應出門欲
降百戶挽鍾帶至斷鍾不聽百戶自經

長洲生員許琰聞京師之變悲號欲絕遍體書景禎
聖上四字絕粒七日而死

谷應泰曰聞之君臣大義有死無貳忠孝大節
有死無貳以故須漕碎體以演納肝蕩陰被矢
侍中濺血莫不氣激傾軫志堅化碧皜皜乎與
秋日嚴霜比潔也然而為之君者或智昏菽麥
恩同草芥有若東昏在齊屠肉沽酒孫皓

燒鋸截頂而且軼道牽牲莫存不喬東堂

猶丐餘生甚乃騎導劉聰之敗身墜景之其

莫不義辱宗社形汚囚繫然則臣者猶尚食
臂不顧蹈難如歸辛賓之死推而不解吉郎之
亡哭而彌嗚呼主辱臣死無所逃也况乎懷

宗宵旰臨朝唏噓畢命公主搥胸妃后並

經死社稷遺詔愛百姓自古亡國正終未有若

斯之烈者以故鼎湖弓墜到處攀髯望帝龍蹄

自然啼血雖穆滿之一軍皆化田橫之五百從

死○傳○美○表○身○成○仁○易○稱○致○命○遂○志○蓋○亦○未○為○過○
也○考○其○時○闔○門○同○死○者○中○允○劉○理○順○新○樂○族○劉○
文○炳○惠○安○伯○張○慶○臻○宣○城○伯○備○時○春○駙○馬○暨○永○
固○金○吾○高○文○采○是○也○父○與○子○俱○死○者○少○司○
兆○祥○儒○生○張○世○禧○是○也○母○與○妻○子○俱○死○者○樞○部○
郎○成○德○金○鉉○是○也○妻○妾○從○死○者○大○學○士○范○景○文○
左○諭○德○馬○世○奇○簡○討○江○偉○御○史○陳○良○謨○勳○丞○
騰○蛟○是○也○獨○身○效○死○者○大○司○農○倪○元○璠○
邦○曜○廷○尉○凌○義○渠○少○司○馬○王○家○彥○太○常○卿○

徵○庶○子○周○鳳○翔○給○諫○吳○甘○來○御○文○王○章○陳○
吏○部○郎○許○直○兵○馬○姚○晟○中○書○宋○天○顯○
文○貴○百○戶○王○某○知○事○陳○真○達○經○歷○張○應○選○
張○是○也○聞○難○餓○死○者○長○洲○諸○生○許○琰○是○也○凡○此○
諸○臣○者○無○論○道○術○素○許○至○性○勃○發○位○列○
邀○一○命○莫○不○椎○心○扼○吭○追○路○相○從○良○以○
銘○馮○生○者○固○少○官○車○晏○駕○孽○蟻○者○益○多○耳○若○乃○
袁○景○倩○之○父○子○並○殲○石○頭○江○萬○里○之○夫○妻○同○趨○
止○水○其○者○一○門○伏○劍○闔○室○自○焚○雖○祖○宗○參○香○之○

忍亦厚音 托循之效也論者又以生多誤國死
未酬君夫文山開閭未室何功張巡嚼齒睢陽
不守而諸人乃以刀筆之深文詆箕尾之穢魄
含血噴人適以自污其口矣又若李爾 和光天
送葬絕命陵前王承恩扶服煤山雉經亭下以
至菜脯湯之瓊慟吳梓官觸衣而死抑何盡節
之多也嗚呼石窮河西盡有吾君之痛風車
馬猶聞殺賊之聲予益讀懷帝之君臣 漢 卷
亡國之氏也雖與日月爭光可也

吾君之痛風車

吾君之痛風車

吾君之痛風車